

PAULO TỸ CARTA HAN: CORINTO TÃ KE AG MỸ CARTA Û

1 ¹Paulo tỹ rá vễ, ẽg régre tỹ Timóteo mré. Jesus Cristo hã ne inh fẽg!, isỹ tỹ ti apóstolo jẽ jé, Topẽ tỹ inh kuprẽg kỹ. Isỹ Topẽ tũ ag mỹ rán vễ, ù tỹ cidade tỹ Corinto tá vẽn h mãn tí ag mỹ, ù tỹ Grécia tá vẽn h mãn tí ag mỹ ke gé. ²Ëg jóg tỹ Topẽ jé ãjag tar han, ti jé ãjag krĩ kuprãg, ẽg Senhor tỹ Jesus Cristo ti ke gé.

Topẽ tỹ Paulo krĩ tỹ kãnhvy' he

³Topẽ mỹ sóg vĩ há han tí, ẽg Senhor tỹ Jesus Cristo panh ti mỹ, ẽg jóg mỹ, ù tỹ ẽg jagãgtãn tí ẽn mỹ. Ëg vễsỹrénh kỹ tóg ẽg krĩ tỹ kãnhvy' he tí, Topẽ ti. Ti hã mỹ sóg agradecer he tí mỹr. ⁴Ti hã ne inh vễsỹrénh mũ ra inh krĩ tỹ kãnhvy' he tí!, inh jagtar tĩn kỹ. Ti tỹ inh krĩ tỹ kãnhvy' he tũgrĩn sóg inh kãnhkã ag krĩ tỹ kãnhvy' he ki kanhró nĩ ha, inh kãnhkã ù tỹ nén ù jagy vég mũ ra. ⁵Cristo jagtar ja ẽn ri ke pẽ ve mág sóg mỹr, hã kỹ Cristo tóg inh krĩ kufy tỹ hẽn ri ke tỹ tũ! he tí gé sir. ⁶Hã ra sóg ãjag jagfy jagtar nĩ, ãjag tỹ ti hã to tar nỹtĩn jé gé, ãjag krenkren jé. Topẽ tỹ isar han kỹ tóg inh kóm ãjag tar han ke mũ gé sir. ãjag tỹ inh kóm jagtar nỹtĩn kỹ ãjag tóg inh kóm ti to krónh kenh ke tũ ní gé sir. ⁷ãjag ki ẽkrén mág sóg tí, hã ra sóg ki kanhró nĩ, Topẽ tỹ ãjag tar han ẽn ki. Ûri ãjag tóg hã ra inh mré jagtar nỹtĩ, hã kỹ Topẽ tóg ãjag krĩ tỹ kãnhvy' he tí gé, ti tỹ inh krĩ tỹ kãnhvy' he tí ẽn ri ke han tóg tí, ãjag mỹ.

⁸Inh kãnhkã!, ãjag mỹ sóg inh jagtar mág ja tó sór mũ. Ga tỹ Ásia tá sóg nén ù jagy tãvĩ ve ja nĩ, tá ag tóg isỹ hẽn ri ke kren, kỹ sóg: “ũri inh hỹn kren mãn ke tũ nĩ ha,” he ja nĩ. ⁹“Ag tỹ isỹ tũg' henh ke hỹn,” he sóg mũ vễ. Ẽn kã sóg Topẽ hã mĩ ẽkrég mũ sir, isỹ vẽn h mỹ kren mãn ke tũ nĩn kỹ. “Ti hã ne inh kren han ki kanhró nĩ,” he ja inh nĩ. “Ûn kãgter mũ ag rĩnrĩn mãn ki kanhró tóg nĩ, kỹ tóg inh kren han ki kanhró nĩ gé,” he ja inh nĩ. ¹⁰Kỹ tóg inh kren han ja nĩ, iser kren mũ ẽn kã, kỹ tóg kejẽn inh kren han mãn ke mũ gé. Ti hã mỹ sóg to vĩ tí, ti hã tỹ inh kren han jé. ¹¹Kỹ iso vãsãn nĩ gé, iso Topẽ mré vĩ kỹ, kỹ Topẽ tóg ãjag vĩ mẽn h mũ. Ti tỹ ãjag vĩ mẽ tũgrĩn inh jagãgtãn kỹ ãjag tóg ti mỹ agradecer henh ke mũ. Kỹ ù tỹ hẽn ri ke ag vỹ Topẽ mỹ vĩ há han ke mũ, ti tỹ inh jagãgtãn ke tũgrĩn.

Paulo tÿ Corinto tá ke ag venh kätig ja tũ

¹²Ha vé, inh jykre tóg tÿ ùn há nÿ, ki kanhró inh nĩ. Vènh kar mÿ sóg nén ù há há han tí, vènh jykre kuryj, kÿ sóg ki há tó tí gé, Topè jykre han kÿ. Inh pi(jé) isÿ vèsóg ki nén to jykren mü ên há han tí. Topè há ne isar han tí, isÿ ti jykre ki króm jé. Kÿ sóg äjag mÿ ti jykre há kámén ja nigti gé. ¹³Tag há rán isóg tí gé, kÿ äjag tóg isÿ rá ve kÿ (äjag tóg) ki kanhrän ke mü gé sir. Ti pi(jé) më jagy tí! Äjag tÿ ki kanhrän kân kÿ tóg há tñh mü. ¹⁴Äjag tÿ ki kanhrän sí tag káfór han kÿ tóg há tñh mü. Kÿ kurä ên kã, êg Senhor tÿ Jesus kurä ên kã tóg äjag mÿ sér tñh ke mü, äjag tÿ inh ven kÿ. Kÿ tóg inh mÿ sér tñh ke mü gé, isÿ äjag ven kÿ.

¹⁵Tag to jykren kÿ sóg äjag ki jun kren ja nigti. Isÿ äjag ki jun ke vè vè, isÿ äjag tar han jé. Isÿ väsÿ äjag tar han ja ên ri ke han män ke vè vè. ¹⁶Kÿ sóg äjag ve kar kÿ (sóg) ga tÿ Macedônia ra tÿg ke mü vè. Kar kÿ, isÿ Macedônia tá kätig män kÿ sóg äjag ve män ke mü vè gé, äjag tÿ inh jagägtän kÿ inh mÿ jänkamy nĩnmĩ! he jé vè vè, isÿ ga tÿ Judéia ra tÿg há han ke to. ¹⁷Hã ra tóg inh mÿ ki krov ja tũ nĩ, há kÿ sóg kätig ja tũ nĩ. Kÿ inh mÿ kanhir kÿ äjag mÿ: “kätig jé sóg ke mü,” he ja nĩ? Vó. Inh jykre pijé!, isÿ kanhir kÿ tó tí ên ti. Kÿ sóg jykre régre han tũ nigti gé. Ûn jykre régre ag tÿ: “hej,” he mü ra ag tóg han sór tũ nĩ. Ge tũ inh nigti. ¹⁸Topè há ne ón vánh nĩ!, há ra tóg ki kanhró nĩ, inh jykre pir nĩ ti. ¹⁹Topè kósin jykre há han sóg tí, Jesus Cristo jykre ti. Inh há ne äjag mÿ ti kámén ja nĩ!, Silas mré, Timóteo mré ke gé. Ti pi(jé) ä tÿ: “hej,” he mü ra han ke tũ nĩ!. Han ti tí, nén ù kar ti, Topè kósin ti. ²⁰Topè há vÿ êg mÿ êg tÿ nén vènh ke ti tó ja nigti, kÿ êg tóg ti kósin há tigrin vèg mü sir, ti panh tÿ êg mÿ nén tó mü ên ti. Hã tó sóg tí, vènh kar mÿ, Topè ón vánh ên há tó sóg tí. Kÿ êg tóg ti há mÿ ví há han tí sir, Topè há mÿ, êg tÿ ti tÿ êg mÿ nén tó mü ên to: “há vè,” hen kÿ. ²¹Topè há ne Cristo ki isar han, äjag mré há. Kÿ tóg êg kuprèg gé. ²²Kÿ tóg êg nigjèg kÿ êg vin tí gé. Ä kuprìg jènèg tóg mü êg mÿ. Ti tÿ êg mÿ ä kuprìg jènè tigrin êg tóg ki kanhró nÿti, ti tÿ êg mÿ nén ù kar vin ke mü ên ti.

²³Ha vé, ki há sóg tó mü, Topè ne ki kanhró nĩ!. Inh ón tí nĩ ra tóg inh vóg kónän mü vè. Isÿ äjag to jũ tũ nĩ jé, há jé sóg äjag tá jun ja tũ nĩ ver, cidade tÿ Corinto tá. Sÿ tá jun ra sóg äjag to jũnh ke mü vè. ²⁴Inh pi(jé) äjag to tar han sór mü! Jesus há ki ge kÿ äjag nÿti, ti há to tar äjag nÿti. Äjag fe tÿ mrin ke han sór sóg mü vè, há jé sóg äjag to väsän tí vè.

2 ¹Hã kÿ sóg tag to jykren ja nĩ, ha më: “ag kanè jun män sór tũ inh nĩ,” he sóg, “há kÿ sóg ag venh tÿg ke tũ nĩ ver,” he sóg äjag to. ²Ha më, isÿ äjag kanè jun kÿ ù nÿ hÿn inh fe tÿ mrin kenh mü!? Isÿ äjag kanè jun kÿ ù tÿ inh fe tÿ mrin kenh ke tóg tũ tí. ³Hã kÿ sóg äjag mÿ vènh rá ên jènè gé, äjag tÿ inh kanè jun tũ nĩn jé gé, sÿ äjag ki jun kÿ. Inh jun kÿ tóg inh mÿ há tñh mü, äjag tÿ inh fe tÿ mrin ken kÿ. Tag to sóg jykren tí gé, ha më. “Ag tÿ inh fe tÿ mrin ke kÿ tóg hÿn ag mÿ sér tí gé,” he sóg tí, äjag to. ⁴Sÿ äjag mÿ carta ên rán mün kÿ sóg to fÿ mág mÿr, äjag tigrin sóg kanè jur, äjag tigrin sóg vènh

mỹ en. Inh pi(jé) ājag kanē jun sór ja nī!. Isỹ ājag to há pē nīn kỹ sóg ājag mỹ vēnh rá ěn han ja nīgtī, ājag tỹ isỹ ājag to há nī tag ki kanhró nỹtīn jé.

Ěg tỹ jagnē mỹ vēnh pāte fón ke

⁵Ha mē, ājag kāmī ũ tóg ājag kanē jur han ja nī. Ti pi(jé) isavīn kanē jun ja nī!. Ājag kar kanē jun ja tóg nī. Hēn ri ke mūn sóg tó há han ja tū nī, isỹ: “ājag kar,” he kỹ. Ājag kāmī ũn e kanē junjur han tóg hā ra, ti tỹ Topē vī mranh tugrīn. ⁶Kỹ ājag tóg hur ti mỹ vī kónān. Ha ti tovānh, gen kỹ. ⁷Vāhā ti mỹ vēnh pāte fón nī, ti mỹ vēnh vī há hā tómnī. Ke tū nī (mū) ra ti fe kaj tóg ti tén ke mū, ha vemnī. ⁸Hā kỹ sóg ājag mỹ tag to vī sór mū vāhā, ha mē: ti mỹ ven nī, ājag tỹ ti to há nỹtī ti. ⁹Isỹ ājag tỹ inh vī kri fig mū ěn ve sór ja vē, hā jé sóg ājag mỹ vēnh rá ěn jēnē ja nī, mỹr, ha mē. ¹⁰Ājag tỹ ũ mỹ vēnh pāte fón kỹ sóg ti mỹ vēnh pāte fón tī gé. Kejēn sóg vēnh pāte fón tī, ũ mỹ. Kỹ sóg Cristo rīnve ti mỹ vēnh pāte fón tī, ājag jagāgtān kỹ. ¹¹Satanás tỹ ěg tỹ hē ri ke tū nīn jé sóg vēnh pāte fón tī. Ti tỹ nén to jykrén mū ěn ki kanhró ěg tóg nī mỹr, Satanás tỹ nén to jykrén mū ti.

Paulo krī kufy

¹²Ha vé, isỹ cidade tỹ Trōade tá jun ja nīn kỹ sóg tá ke ag mỹ Cristo kāmē sér ěn tó ja nīgtī. Kỹ ag tóg jēmē há han ja nīgtī, ěg Senhor tỹ ag krīn kỹ. ¹³Hā ra sóg ěg mré ke tỹ Tito ve ja tū nī tá. Isỹ tá ti venh ke vē vē, hā ra tóg ki tū nī, isỹ tá jun mū ra. Hā kỹ sóg ti to krī kufy nī ja nīgtī. Hā kỹ sóg ag mỹ: “isīg ke vē,” he kỹ tīg ja nī sir, ga tỹ Macedōnia ra, ti nón.

Jesus vī tỹ nén ger há ri ke nī

¹⁴Hā ra sóg Topē hā mỹ vī há han tī. Ti hā ne inh jēnēg tī!, isỹ ěmā kar mī tīg jé, Cristo tugrīn. Kỹ vēnh kar tóg ti tỹ tỹ ũn mág pē nī hā vég tī, ag tỹ inh jykre jagma ěvānh kỹ. Hā kỹ vēnh kar tóg ti ki kanhrān mū sir, isỹ ag mỹ ti tón kỹ. Kỹ tóg ag mỹ nén ger há kri nī nī, ag tỹ ti vī mēn kỹ. ¹⁵Nén ger há tóg vēnh kar kri rūm ke tī. Ri ke ti nī, isỹ vēnh kar mỹ Cristo kāmén kỹ, ag tỹ Topē ki kanhrān jé. Vēnh kar mỹ sóg ti vī tó tī, ũn krenkren mū ag mỹ, ũn vāgfor kỹ nỹtī ag mỹ ke gé. ¹⁶Ūn vāgfor kỹ nỹtī ag tỹ inh vī mēg mū ra kri fig tū nīn kỹ ag tóg nūgme ki vár ke mū. Kỹ inh vī tóg ag mỹ nén ũ ter ger gy ěn ri ke nī. Ag jāvo ũn krenkren mū ag tỹ inh vī jēmē kỹ ag tóg rīnrīr ke mū, ag tỹ inh vī kri nīm kỹ. Kỹ inh vī tóg ag mỹ ěg tỹ nén ger há mē kỹ ěg fe tỹ mrin ke ěn kri nī nī. Hā ra ěg pi(jé) vēsóg ki vēnh rānhrāj tag han há nỹtīgtī!. ¹⁷Ha vé, ũ ag vỹ Topē vī kāmén to ti kaja ve sór tī, jānkamy ve sór to ag tóg Topē vī kāmén tī. Ke tū nī kỹ ag tóg ti vī tó ěn tugrīn vēsỹ ũn mág han tī. Ag jāvo inh pi(jé) ti kaja ve sór tī!, inh pi(jé) vēsỹ ũn mág han sór mū!. Cristo ki rā kỹ sóg Topē rīnve ti kāmén tī. Jykre pir han sóg tī gé mỹr. Kỹ ũ tỹ inh jēnēg mū vỹ tỹ Topē ti nī.

Věnh jykre tåg

3 ¹Kỹ ājag h̄yn iso: “tỹ sóg ũn há nĩ, he tóg tĩ, Paulo ti,” he sór tĩ. Hã tũ v̄e. Ũ ag tóg ājag m̄y carta to v̄i tĩ, k̄y ag tóg: “ũn há v̄y tỹ ti nĩ, hemnĩ iso, carta ki,” he tĩ, “k̄y v̄enh kar tóg v̄enh rá tag ve k̄y is̄y tỹ ũn há nĩ ki kanhró n̄ȳt̄inh m̄ũ,” he ag tóg tĩ. Inh pi(jé) carta tỹ ge ma t̄ig sór m̄ũ. ²Inh m̄y ājag tóg carta ri ke n̄ȳt̄i. Ājag m̄i sóg ěkrég tĩ, k̄y sóg v̄enh kar m̄y ājag kāmén tĩ. Inh hã ki ag tóg ājag jykre há v̄ég tĩ, k̄y ag tóg is̄y tỹ ũn há nĩ ěn ki kanhr̄an m̄ũ sir. Hã ki ājag tóg carta ri ke n̄ȳt̄i. ³Ājag m̄y sóg Cristo jykre kāmén ja nĩ, k̄y ājag tóg m̄i m̄ũgt̄i. K̄y v̄enh kar tóg ājag jykre ve k̄y (ag tóg) Cristo ki kanhró n̄ȳt̄i, k̄y ājag tóg tỹ Cristo tỹ v̄enh rá ri ke n̄ȳt̄i, s̄y carta han ja ri ke. Hã ra ti pi(jé) caneta tỹ rán k̄y nĩ. Top̄e kupr̄ig tỹ tóg rán k̄y nĩ, ũn r̄ir nĩ ěn kupr̄ig tỹ tóg rán k̄y nĩ, carta ěn ti. K̄y tóg pó tỹ rán jaf̄a kri rán k̄y nĩ tũ nĩ gé. Ěg ki tóg rán k̄y nĩ, k̄y tóg tỹ ěg jykre nĩ sir, carta ri ke ěn ti.

⁴Top̄e hã v̄y Cristo tỹ isar han tĩ, hã k̄y sóg ājag ki carta tỹ ge han ki kanhró nĩ. ⁵Inh pi(jé) v̄esóg ki n̄én ũ há to jykren ki kanhró nĩ. Inh pi(jé) v̄esóg ki n̄én ũ há han ki kanhró nĩ gé. H̄y, Top̄e hã ne isar han tĩ, is̄y n̄én ũ há han ke to. ⁶Ti hã ne inh kr̄in tĩ, is̄y ti jykre tåg kāmén jé, v̄enh kar m̄y. Ti pi(jé) ěg m̄y v̄as̄y n̄én rán k̄y nĩ ěn tó m̄an m̄ũ. V̄ahã tóg ěg m̄y ā kupr̄ig j̄en̄eg m̄ũ. V̄enh jykre tåg to ken hã v̄e, hã v̄y: “Top̄e kupr̄ig tỹ ěg kr̄in m̄ũ,” he m̄ũ. Ha vé, Top̄e kupr̄ig v̄y ěg r̄in tĩ, j̄avo v̄as̄y Top̄e v̄i rán k̄y nĩ ěn v̄y ěg t̄en ke ja n̄igt̄i, ěg tỹ mranh k̄y.

⁷Top̄e v̄i tỹ v̄as̄y rán k̄y nĩ ja ěn v̄y pó kri rán k̄y nĩ ja nĩ, ũ tỹ ěg t̄en m̄ũ ěn ti. Moisés tóg pó kri ti rán ja nĩ, Top̄e tỹ ti m̄y tón k̄y. Ti tỹ ti m̄y tó kar k̄y ti kakã tóg j̄engr̄e nĩ ja n̄igt̄i, Moisés ti. K̄y tóg Israel ag m̄y e ja tĩ, Moisés kakã ki ěv̄anh tũ ja ag tóg n̄igt̄i sir, ti tỹ kakã j̄engr̄e n̄in k̄y. Hã ra tóg kej̄en tũ! he ja n̄igt̄i gé, ti kakã j̄engr̄e ti. ⁸K̄y ũ tỹ Top̄e kupr̄ig kāmén m̄ũ ěn h̄yn tóg Moisés kakã j̄engr̄e k̄afór nĩ, ti s̄inv̄i k̄afór ti nĩ. ⁹Moisés v̄y Top̄e tỹ ěg vóg kón̄an ke ěn tó ja n̄igt̄i. Hã ra Top̄e v̄i tag tóg ti kakã j̄engr̄e han, ti s̄inv̄i han ti. J̄avo sóg Top̄e tỹ ěg m̄y v̄enh p̄ate fón ke ěn hã tó tĩ. Ti tỹ ěg to “jykre há ag n̄ȳt̄i ha,” he m̄ũ ěn tó sóg tĩ. Top̄e v̄i tag tugr̄in sóg Moisés s̄inv̄i k̄afór p̄e nĩ. ¹⁰K̄y v̄as̄y n̄én s̄inv̄i ěn tóg v̄ahã ěg m̄y s̄inv̄i tũ nĩ ha, v̄as̄y j̄engr̄e ěn tóg ěg m̄y j̄engr̄e tũ nĩ ha, ěg tỹ ũ tåg tag s̄inv̄i ve k̄y, ěg tỹ ũ tåg j̄engr̄e ven k̄y. Ũn tåg tag v̄y n̄én kar s̄inv̄i k̄afór nĩ. ¹¹V̄as̄y rán k̄y nĩ ja ěn tóg tũ! he ja nĩ. K̄y ũ tỹ tũ! he m̄ũ ěn tóg s̄inv̄i ja n̄igt̄i gé. Ti j̄avo is̄y v̄enh jykre tó m̄ũ tag v̄y tũ! henh ke tũ p̄e nĩ, hã k̄y tóg ũn si s̄inv̄i ěn k̄afór nĩ.

¹²Ěg tỹ tag venh ke j̄av̄anh sóg m̄ũ m̄ȳr. Hã k̄y sóg jamã hár(a) tó m̄ũ, inh pi(jé) s̄y ag m̄y tó jé to m̄y'lag m̄ũ. ¹³Moisés ri ke han tũ sóg nĩ. Kur tỹ tóg v̄enh kri fón ja nĩ. K̄y tóg v̄enh pugr̄in ja nĩ, ti tỹ ā kakã j̄engr̄e ěn p̄eju jé. Hã ra tóg kom̄er hã tũ! he ja nĩ, ti j̄engr̄e ěn ti. Hã k̄y tóg kur kr̄em v̄enh p̄eju, Moisés ti, Israel ag tỹ ti j̄engr̄e v̄ég tũ nĩ jé. ¹⁴Hã ra ag tóg ũri ki kagt̄ig n̄ȳt̄i gé ver. K̄yvó ri ke ag n̄ȳt̄i, kutu, Israel ag. Ag tỹ v̄as̄y rán k̄y nĩ ěn to ken k̄y tóg ag m̄y Moisés v̄enh pugr̄in k̄y nĩ ěn ri ke nĩ, ti p̄akr̄i ri ke. Ag tỹ ki kagt̄ig to ken hã v̄e. Cristo hã tugr̄in ěg tóg v̄as̄y n̄én rán k̄y nĩ ěn to jykren há han m̄ũ ha, hã ra ag tóg ki kagt̄ig n̄ȳt̄i j̄avo. ¹⁵Hã k̄y

ag tóg Moisés tỹ nén rán mũ to ke ěn mĕg tĩ, hã ra ag tóg to jykrĕn tũ nĩgtĩ, kỹ tóg Moisés vĕnh pugrĩn ěn ri ke nĩ ag mỹ, ti pãkrĩ ěn ri ke. ¹⁶Kejĕn ũ tóg ěg Senhor ki rã mũ, ag kãki ũ. Kỹ tóg vãhã ag tỹ ti vĕnh pugrĩ vym ri ke nĩ. ¹⁷Hã kỹ tag tóg rán kỹ nĩ, Topĕ vĩ rá ki, ha mĕ: Moisés tỹ ěg Senhor mrĕ vĕmĕn kỹ tóg ã vĕnh pugrĩn tỹ vym ke ja nĩgtĩ,” he ja tóg nĩ, Topĕ vĩ rá ki. Topĕ kuprĩg to ken hã vĕ, ěg Senhor he mũ tag ti. Kỹ ěg Senhor kuprĩg hã ne ěg kygvãn ke mũl, ěg tỹ ti vĩ ki króm ke to. ¹⁸Hã kỹ tóg ěg mỹ ti vĕnh pugrĩn tỹ vym ke ja ri ke nĩ, kỹ ěg tóg ěg Senhor sĩnvĩ ěn, jĕngrĕ ěn ve há han tĩ. ěg tỹ vĕnh ve jafã ki nén ũ ve há ěn ri ke tóg nĩ sir. ěg tỹ ěg Senhor ki ěvãnh kỹ ěg tóg ti ri ke nỹtĩnh ke mũ gé. Komĕr hã ěg tóg ve ũ han ke mũ, ti ve ěn ri ke, ěg tỹ ti tugnỹm kỹ, ěg tỹ ěg Senhor tugnỹm kỹ, ti kuprĩg ti.

Paulo krój nĩ

4 ¹Inh rãnrãj hã vĕ, Topĕ tỹ inh mỹ vĕnh rãnrãj nĩm jan hã vĕ. Kỹ tóg inh jagãgtãn mũ gé, isỹ ti rãnrãj to krónh ke tũ nĩ jé. ²Hỹ, ũ ag tóg nén tỹ ěg mỹ'ag han tĩ ěn han tĩ, kuty tá, ũ tỹ ag vég tũ nĩn jé. Vĕnh jykre tỹ ge tovãnh kãn inh huri mỹr. Kỹ sóg ãjag mỹ ón tũ nĩgtĩ gé, ãjag lograr henh ke tũ sóg nĩ gé. Ón kỹ sóg: “Topĕ vỹ tag tó ja nĩ,” he tũ nĩ gé. Ki hã sóg tó tĩ. Topĕ rĩnve sóg vĕmĕn tĩ, hã kỹ sóg ón tũ nĩgtĩ. ũ tỹ isugnỹm mũ ěn vỹ ki kanhrãn kãn ke mũ, inh jykre ki. ³Kỹ ũ tóg kejĕn ki kagtĩg nỹtĩ, isỹ Jesus kãme sér tó mũ ěn ki. Ag mỹ tóg nén ũ péju kỹ nĩ ri ke nĩ. ũ tỹ vãgfor kỹ nỹtĩ ag vĕ, hã kỹ ag tóg ki kanhrãn tũ nĩgtĩ. ⁴Kyvó ag nỹtĩ, krĩ tũ ag nỹtĩ. Jesus ki ge sór tũ ag nỹtĩ, Satanás tỹ ag kyvó nĩm ti kỹ. ěprã pãli ag kri ke vỹ tỹ ti nĩ, Satanás ti. Ti tỹ ag kyvó nĩm ti kỹ ag tóg Cristo kãme tag to jykrĕn tũ nĩgtĩ. Ti jĕngrĕ vég tũ ag tóg nĩgtĩ, ti sĩnvĩ ti. Cristo hã vỹ tỹ Topĕ kãnhvég ri ke nĩ, ti ve ri ke.

⁵Inh pi(jé) inh jykre kãmĕn tĩ! Jesus Cristo hã kãmĕn sóg tĩ, ti tỹ tỹ ěg Senhor nĩ ti. Jãvo sóg tỹ ãjag camarada ri ke nĩ, isỹ Jesus to há nĩn kỹ. ⁶Ha vé, ũ tỹ kutyng mũ ra kurãg han mũ ěn tóg ěg ki kurã han mũ gé sir, Topĕ ti, ěg tỹ ki kanhrãn jé, Topĕ tỹ tỹ ũn mág nĩn ki. ěg tỹ Cristo ve kỹ ěg tóg Topĕ ki kanhrãn tĩ. Cristo vỹ tóg Topĕ ve hã pĕ nĩ. ěg ki kurã to ken hã vĕ, hã vỹ: Topĕ ki kanhró he mũ.

⁷ěg tỹ tỹ ěprã ke nỹtĩ (hã) ra tóg ěg kanhrãn sór tĩ, kỹ tóg ěg tỹ go'or tỹ kukrũ han kỹ kãki jãnkamy e vin ěn ri ke nĩ. ěg hã vỹ tỹ go'or tỹ kukrũ ěn ri ke nỹtĩ, ěg krój nỹtĩn kỹ, inh ke gé. Hã ra tóg ěg kanhrãn tĩ, vĕnh kar tỹ ti hã tỹ tỹ ũn tar tãvĩ nĩ ěn ve je. Jãnkamy ri ke to ken hã vĕ. ěg pi(jé) tar nỹtĩ! ũ tỹ ěg tar han mũ vỹ tỹ Topĕ ti nĩ. ⁸Inh krój nĩ ra Topĕ tỹ isar han mũ vĕ, ha vé ha. Nén kar tóg inh kutãn tĩ, hã ra inh pi(jé) to krĩ kufy han tĩ! Kejĕn tóg inh jykre tũ tĩgtĩ, kỹ tóg isỹ: hỹ mỹ vỹ? he ja há tĩgtĩ, hã ra inh pi(jé) to krónh ke tĩ! ⁹Inh vóg kónãn ag tóg tĩ, hã ra Topĕ pi(jé) isovãnh tĩ! Inh rỹnh ag tóg tĩ, hã ra ag pi(je) isĕn tĩ! ¹⁰Kurã kar ki sóg Jesus vĕsỹrĕnh ěn ri ke han tĩgtĩ. Hã tugrĩn vĕnh kar tóg Jesus rĩr nĩ tag venh ke mũ gé, inh vĕsỹrĕnh tugrĩn. ¹¹Kurã kar ki sóg ter kren tĩ, Jesus tugrĩn. Hã ki Jesus rĩr nĩ tóg inh ki ve há tĩ, inh fãr vag ke mũ ra. ¹²Iser kren kỹ ãjag tóg tar nỹtĩ jãvo, rĩnrĩr ãjag nỹtĩ.

¹³Tag vỹ Topě vī ki rán kǵ nĩ, ha mē: “Topě vī kri nĩm inh, hã kǵ sóg tó,” he ja tóg nĩgtĩ, Topě vī rá ki. Topě vī tag hã vỹ inh jykre han tĩ, hã kǵ sóg tó tĩ gé. Kri fig sóg tĩ, hã kǵ sóg tó tĩ mǵr. ¹⁴Topě ne ěg Senhor tỹ Jesus rĩn mǎn ja nĩ'. Ěn vỹ inh rĩn mǎn ke mũ gé, ki kanhró sóg nĩ. Kurã ěn kã tóg ajag mré inh jé prēr ke mũ, ěg tỹ ti mǵ vėnh ven jé. ¹⁵Ājag tugrĩn sóg ti jagy tag ve kǎn tĩ. Kǵ komēr hã ũn e tóg Topě tỹ ag jagãgtǎn tag mėnh ke mũ. Vėnh grun jé ěg tóg ke mũ, kǵ ũn e tóg sir ti mǵ vĩ há han ke mũ. Kǵ Topě to vĩ há han mũ ag tóg e tǎvĩ nỹtĩ sir. Topě tỹ tỹ ũn mág nĩn hã vė.

Ěg tỹ Jesus ki ge kǵ nỹtĩn kǵ ěg krenkren ke

¹⁶Hã kǵ sóg to krónh ke jǎvǎnh nĩ. Ha vé, inh fár tag tóg krój nĩ, komēr hã tóg ter sór mũ, ti vag jé. Hã ra inh kuprĩg tóg tar nĩ jǎvo. Kurã kar ki tóg vėnh han mǎn tĩ, Topě tỹ isar han kǵ, inh kuprĩg ti. ¹⁷Tag ki sóg ti jagy vėg tĩ, hã ra tóg inh mǵ kǎnhvy nĩ. Tũ' he jé tóg ke mũ, tag ki ti jagy ti. Tá ěg tóg nén ũ há tǎvĩ venh ke mũ, ěg tỹ tag ki ti jagy ve ja tugrĩn, hã ra tóg tũ' he jǎvǎnh nĩ, ěg tỹ tá nén venh ke mũ ěn ti. Ki kagtĩg ěg nĩ ver, hã ra tóg há tǎvĩ nĩnh mũ, ěg tỹ tag ki nén ũ há ve kǎfór ti nĩnh mũ, tá. ¹⁸Hã ve sór inh nĩ, hã mĩ sóg ěkrég tĩ. Ver ěg tóg vėg tũ nĩgtĩ, sỹ nén ve sór mũ tag ti. Hã kǵ sóg ěg tỹ nén (ũ) vėg mũ tag to jykren sór tũ nĩgtĩ. Ěg tỹ nén (ũ) vėg mũ tag vỹ tũ' henh ke mũ. Ěg tỹ ũri nén (ũ) vėg tũ ěn vỹ tũ' henh ke tũ nĩ, ěg tỹ tá nén venh ke mũ ěn ti.

5 ¹Ěg fár vỹ ěg pǎjó ri ke nĩ. Tũ' he jé tóg ke mũ, ěg fár ti. Hã ra Topě ne ěg mǵ ĩn tǎg ri ke han ke mũ', kǎnhkã tá'. Hã ra tóg ěg tỹ tag ki ĩn han ri ke tũ nĩ. Tũ' he jǎvǎnh tóg nĩ, Topě tỹ ěg jamã tǎg han mũ ti. ²Tag ki ěg tóg vėsýrėnh tĩ, ěg fár tỹ ěg pǎjó ri ke tag ki. Kǵ tóg ěg tỹ kǎnhkã tá ěg jamã tǎg ěn venh há tĩ. Hã jé ěg tóg prēr tĩ. Kǵ tóg ěg tỹ kur tǎg tu ri ke nĩ. ³Ěg tỹ kur tu kǵ ěg kator tũ nỹtĩ. Ěg kur ri ke ti nĩ, kǎnhkã tá ěg jamã ti, ěg tỹ ěg fár tǎg tun kǵ. ⁴Ha vé, ki hã sóg tó mũ. Tag ki, ěg tỹ ěg fár tỹ pǎjó ri ke tag ki nỹtĩn kǵ ěg tóg vėsýrėnh tĩ, ěg mǵ ěg ter jǎvǎnh tũn kǵ. Ěg mǵ tóg ěg rĩr hã tag tỹ kǎnhkã tá jun há tĩ vė, kǵ tóg ěg tỹ tag ki ěg kur kunũg tũ ra ěg tỹ kǎnhkã tá jun kǵ ěg kur tǎg tu ri ke nĩnh mũ, ěg mǵ. Kǵ ěg tỹ ěg fár tǎg ve kǵ ěg fár si tóg tũ' he mũ, ěg ter tũ ra. Tag hã tóg ěg mǵ há tĩnh mũ vė. ⁵Ěg tỹ kǎnhkã tá ěg fár tǎg venh ke jé Topě tóg ěg mǵ vėnh jykre nĩm, kǵ tóg ěg mǵ Ā kuprĩg jėnė gé. Hã ki ěg tóg ki kanhró nỹtĩ, ěg tỹ tá nén (ũ) venh ke mũ ěn ki.

⁶Hã kǵ tóg inh mǵ sér tĩ. Ěg tỹ ver ga kri mũn kǵ ěg tóg ěg Senhor vėg tũ nĩgtĩ ver. ⁷Ěg tỹ ti vėg tũ ra ěg tóg ti vĩ kri fig tĩ. ⁸Kǵ sóg kanė jur mǎn tũ nĩ ha. Isỹ inh fár tỹ pǎjó ri ke tag tovǎnh há tóg tĩ, sỹ ěg Senhor mré nĩ jé, inh jamã pė tá. ⁹Hã kǵ sóg vǎsǎn tĩ, inh jykre tỹ ti mǵ há nĩ jé. Isỹ tag kã nĩ kǵ sóg vǎsǎn tĩ, kǵ sóg tá vǎsǎn ke mũ gé, sỹ tá ti mré nĩnh ken kǵ.

¹⁰Ha vé, ěg kar vỹ Cristo mǵ vėnh ven ke mũ, ti tỹ ěg jykre tugnỹm jé. Kǵ tóg ěg mǵ nĩm ke mũ, ěg tỹ tag ki nén (ũ) han mũ kaja ti. Ũ tỹ tag ki nén (ũ) há han mũ ěn tóg Ā tũ kajan venh ke mũ gé, kǵ ũ tỹ tag ki nén (ũ) kórég han mũ ěn ag tóg ajag vėsýrėnh venh ke mũ gé sir.

Cristo tÿ ěg jykre si tÿ tũ' he

¹¹Ha vé, ěg Senhor kaměg sóg tĩ, hã kÿ sóg ěprã ke ag mÿ ki hã tó tĩ, ag tÿ ti ki ge jé. Topě hã ne inh ki kanhró kar nĩ'. Kÿ ājag hÿn, ājag tÿ něn to jykřn há han kÿ (ājag hÿn) inh ki kanhró nÿtĩnh ke mũ gé, he sóg ti. ¹²Inh pi(jé) ājag mÿ: “ũn mág vÿ tÿ inh nĩ,” he sór tĩ'. Hã ra sóg ājag mÿ věnh kãměn mũ, ti tÿ ājag mÿ sér tĩ jé, sÿ ājag mÿ něn (ũ) kãměn mũ ěn tugřn, ājag tÿ iso: “jykre há tãvi ti nĩ,” he jé. Tag tómnĩ, ũ tÿ věsÿ tÿ ũn mág han sór mũ ag mÿ. Ũ tÿ ge jykre vÿ sĩnvĩ nĩ ve nĩ, hã ra tóg ěg tÿ ve há han kÿ (tóg) krój nĩ, ag jykre ti. ¹³Ha vé, krĩ tũ inh něji nĩ. Topě jykre han tugřn sóg krĩ tũ nĩ ve nĩ. Kejěn sóg krĩ há han tĩ gé. Ājag tugřn ke vě, inh krĩ há ti. ¹⁴Cristo hã vÿ tÿ inh fe nĩ, hã kÿ sóg věnh kar to há nĩ. Tag to sóg jykřn mũ, ha mě: věnh kar jagfy tóg ter ja nĩ, Cristo ti, kÿ ěg kar jykre si vÿ tũ' he mũ sir, ti jaměn kÿ. ¹⁵Ti hã ne věnh kar jagfy ter ja nĩ'. Hã kÿ ěg pi(jé) tÿ ěg tũ nÿtĩ', ũri!. Ti tũ vÿ tÿ ěg nÿtĩ, ti tÿ ěg jagfy ter ja nĩn kÿ, ti tÿ ěg jagfy řir mãn ja nĩn kÿ ke gé. Kÿ ti hã ne ěg mÿ ěg tÿ něn han ke mũ ěn tó tĩ', ũri!.

¹⁶Vãsÿ ěg tóg ěg tÿ věsóg ki něn (ũ) to jykřn kÿ (ěg tóg) ěprã ke jykre to: “tag vÿ há nĩ, tag vÿ kórěg nĩ,” he ja nĩgtĩ. ũri ěg tóg věsóg ki tag to jykřn mãn ke tũ nĩ ha. Cristo to ěg věsóg ki jykřn mãn ke tũ nĩ gé, ěg tÿ vãsÿ věsóg ki ti to jykřn' he ja ěn ri ke tũ vě ha, ũri. ¹⁷Hě ri ken kÿ? Cristo tÿ ěg han mãn kÿ mÿr. Ti ki ge kÿ ěg nÿtĩ, hã kÿ tóg ěg han mãn ja nĩ. ěg jykre si tóg tũ ti ha, ěg tÿ něn han ja ěn tóg tũ ti ha ke gé. ũri ěg tóg tÿ ũn tãg nÿtĩ ha, ěg krĩ, ěg jykre ti ke gé. ¹⁸Topě tÿ něn han mũn hã vě. Topě kato vãsãn ěg ti vě, hã ra ěg tóg ũri tÿ Cristo mrě ke nÿtĩ ha, Topě tÿ ěg han mãn kÿ, Cristo tugřn. Kÿ tóg ěg mÿ věnh rãnrhãj tag nĩm mũ gé sir, ěg tÿ věnh kar mÿ: tÿ Cristo mrě ke nÿtĩmnĩ, he jé. ¹⁹Ha vé, Topě vÿ Cristo jěně, ti tÿ ěg tÿ tÿ ti mrě ke nÿtĩ han jé, ěprã ke kar tÿ ti ki ge sór jé. Kÿ tóg ěg tÿ ti vĩ mranh tÿ tũ' he sór mũ gé sir, ěg tÿ ti kaja kórěg věg tũ nĩ jé. Kÿ tóg ěg mÿ: ha věnh kar mÿ tó, isÿ ag to há nĩ sór mũ ti,” he ja nĩ gé.

²⁰Cristo hã ne inh jěněg mũ', isÿ ti jiji tó jé. Kÿ Topě tóg věnh kar jyvěn tĩ, kÿ sóg hã tó jě nĩ. Hã kÿ sóg Cristo jyjy tó kÿ (sóg) ājag mÿ tag to vĩ sór mũ, ha mě: “Topě to há nÿtĩmnĩ, ti kato vãsãn mãn sór tũg nĩ,” he sóg mũ. ²¹Jesus pi(jé) Topě vĩ mranh ja nĩgtĩ!. Hã ra tóg ěg tÿ ti vĩ mranh ja ěn kajãm kãn. Kÿ tóg ěg mÿ Topě jykre kuryj ěn nĩm mũ sir, ěg jagfy kajãm kar kÿ.

6 ¹Topě mrě sóg rãnrhãj tĩgtĩ. Hã kÿ sóg ājag jyvěn mũ, ājag tÿ Topě vĩ ki króm jé. Ājag tÿ ti vĩ ki króm tũ nĩn kÿ tóg fagrĩnh mÿ ājag jagãgtãn nĩ. ²Ti hã ne tag tó ja nĩ', ha mě: sÿ ājag jagãgtãn ke kurã ki sóg ājag tÿ inh mÿ něn to vĩ mũ ěn han ke mũ. Ājag krenkren ke kurã ki sóg ājag krenkren han ke mũ,” he ja tóg nĩ, Topě ti. Ājag krenkren ke kurã vÿ hur jun, ha mě. ũri tóg ěg krenkren han sór mũ, Topě ti.

³Kÿ sóg něn ũ věnhmÿ han tũ nĩgtĩ sir, ũ tÿ iso věnh jykre kórěg tó tũ nĩ jé, inh rãnrhãj to. ⁴Věnh jykre há mĩ sóg tĩ mÿr, isÿ tÿ Topě camarada jěn kÿ, kÿ inh jykre tóg věnh kar mÿ ve há tĩ. Isÿ něn ũ jagy věg mũ ra sóg ti to krónh ke tũ nĩgtĩ, ijagtar nĩ ra, inh kaně jur mũ ra. ⁵Kejěn ag tóg inh mrãnmrãn tĩ,

věseja kătă ag tóg inh fón tí, věnh kar tóg kejĕn inh kri rūv tí. Kejĕn sóg inh rānhrāj tŷ inh kutān to jagtar tí, kejĕn sóg nūr tū nĭgtĭ, kejĕn sóg vējĕn vég tū nĭgtĭ. ⁶Isŷ ti jagy vég mŷ hā ra ijykre tóg tŷ ūn há nŷ, Topĕ vĭ ki kanhró mág sóg nĭ, věnh kar to sóg fe nĭ, věnh kar mŷ sóg komĕr hā vĭ tí, věnh kar tŷ isŷ tŷ Topĕ camarada jĕ tag ki kanhrān kān jĕ. Topĕ kuprĭg vŷ tŷ inh jagrĕ nĭ, hā kŷ sóg věnh jykre kuryj to tar nĭ. Inh pi(jĕ) ón kŷ ū to há nĭ! ⁷Ki hā tó sóg tí. Topĕ hā ne isar han! Ti hā ne inh mŷ ā jykre kuryj nĭm!, kŷ tóg tŷ isŷ tŷ rará jafā nĭ, Topĕ jykre há ĕn ti. Inh kren han tóg, Topĕ ti, ti tŷ inh mŷ věnh jykre kuryj nĭm ti kŷ, kŷ ag tóg ti jykre hā tugrĭn (ag tóg) ājag jykre kórég vég tí gé.

⁸Kejĕn ag tóg inh mŷ vĭ há han tí, kejĕn ag tóg iso é he tí. Kejĕn ag tóg iso ti kórég kar tó tí, kejĕn ag tóg iso nĕn ū há tó tí. Kejĕn ag tóg iso: “ti ón nĕ,” he tí, hā ra sóg ón vānh nĭgtĭ. ⁹Ū tóg kāmĭ inh ki kagtĭg nĭ ve nŷtĭ, hā ra věnh kar tóg inh ki kanhró nŷtĭ. Ter kren tŷ hĕn ri ke han sóg tĭgtĭ, hā ra sóg rĭr tí nĭ ver. Inh vóg kónān ag tóg tí, hā ra ag tóg isĕn ja tū nĭ. ¹⁰Inh fe kaj tóg tí, ge ra tóg inh mŷ sér tí. Jagtar sóg tí, hā ra sóg ū tŷ hĕn ri ke ag jagāgtān tí, ag mŷ Topĕ vĭ tón kŷ. Nĕn ū tŷ isóg tū tū nĭ, hā ra Topĕ tŷ ĕg mŷ nĕn nĭm mŷ ĕn kar vŷ tŷ isŷ nŷtĭ.

¹¹Ājag hā mŷ sóg ijagtar tag kāmĕn mŷ, tó kān sóg mŷ, ājag mŷ, isŷ ājag to há tāvĭ nĭn kŷ. Ājag hā to sóg fen mág kŷ nĭ. ¹²Inh pi(jĕ) ājag to kórég nĭ! Ājag hā ne iso há tū nĭ ve nŷtĭ! ¹³Inh krĕ ri ke ājag nŷtĭ. Hā kŷ sóg ājag mŷ tag to vĭ sór mŷ, ha mĕ: “isŷ ājag to há kóm iso há nŷtĭmnĭ, iso fe mág nŷtĭmnĭ,” he sóg mŷ.

Ū tŷ Jesus ki ge tū ag pi(jĕ) tŷ ĕg mré ke nŷtĭ!

¹⁴Ū tŷ Jesus ki rā tū mré jykrĕn sór tŷg nĭ. Tŷ ag ĕg mré ke tū nŷtĭ. Hā kŷ ūn jykre pāno ag mré jykrĕn sór tŷg nĭ gé, ājag tŷ věnh jykre kuryj han kŷ nŷtĭn kŷ. Kurā pi(jĕ) tŷ kuty mré ke nĭ! ¹⁵Cristo pi(jĕ) Japo mré jykrĕn tí! Kŷ ū tŷ ti ki rā kŷ jĕ pi(jĕ) ū tŷ ti ki rā tū mré jykrĕn há nĭnh mŷ! ¹⁶Kŷ Topĕ jo ĭn pi(jĕ) tŷ ón kŷ topĕ jo ke nĭ! Ha vé, Topĕ jo ĭn vŷ tŷ ĕg nŷtĭ, ūn rĭr mŷ jo ĭn. Ti hā ne tag tól, ha mĕ: “ag ki sóg ijamā han ke mŷ, ag mré sóg tĭg ke mŷ, ag Topĕ vŷ tŷ inh nĭnh mŷ, kŷ ag vŷ tŷ inh povo nŷtĭnh mŷ,” he ja ti nĭgtĭ.

¹⁷Hā kŷ ĕg Senhor tóg tag tó, ha mĕ: “ag ré kŷ mŷmnĭ, vyrnŷ nŷtĭmnĭ. Vĕnh jykre kavĕj han tŷg nĭ, kŷ sóg ājag mŷ: ha kāmŷ jĕg, hĕnh ke mŷ. ¹⁸Ājag jóg vŷ tŷ inh nĭnh mŷ, kŷ ājag vŷ tŷ inh krĕ nŷtĭnh mŷ,” he tóg, ĕg Senhor ti, ū tŷ nĕn (ŭ) kar han ki kanhrān kŷ nĭ ĕn ti,” he ja tóg nĭgtĭ, Topĕ vĭ rán ki.

7 ¹Inh kanhkā!, inh fe vŷ tŷ ājag nŷtĭ. Hā kŷ sóg ājag mŷ tag tó mŷ. Ēg hā mŷ tóg tó mŷ, Topĕ ti, ti tŷ tŷ ĕg jóg mág nĭ tag ti, kŷ ĕg tóg ti venh ke mŷ. Ājag tŷ ti ve hā jĕ nĕn (ŭ) kavĕj ĕn tovānh kān nĭ, ājag jānhkri nŷtĭ jĕ. Nĕn (ŭ) kavĕj han tŷg nĭ, to jykrĕn tŷg nĭ gé. Komĕr hā jykre há tāvĭ nŷtĭ sórmnĭ. Topĕ tŷ vŷ tŷ ĕg nŷtĭ, kŷ ti kamĕg nĭ, ti jykre kuryj ĕn ri ke nŷtĭ sórmnĭ.

Paulo fe tŷ mrin ke

²Iso fe mág han mān nĭ, ha mĕ. Inh pi(jĕ) ū mŷ věnh jykre pāno han sór tí!, inh pi(jĕ) ū krĭn kónān sór tí!, inh pi(jĕ) ū tŷ nĕn ū péju sór tí!.

³Isȳ ājag m̄y tag tó m̄y jāvo sóg ājag to kórég tū nī. Ājag mré ke v̄y t̄y inh nī, k̄y ěg tóg jatun m̄y jagnē mré m̄y m̄y, jagnē mré k̄agter ěg tóg ke m̄y gé, hēn ri ke m̄yn. ⁴Inh m̄y ag tóg vēnh vī há tónh ke m̄y, he sóg tī ājag to. K̄y sóg vēnh kar m̄y ājag to: há ag n̄ytī, he tī. Tag ki sóg ti jagy pē vég m̄y, hā ra inh krī tóg k̄anhvy nī, ājag to, k̄y tóg sir inh m̄y sér pē tī.

⁵Ha vé, isȳ ga t̄y Macedônia tá jun k̄y sóg nēn ū t̄y inh krī kupr̄ag ke ve ja tū nī. Tá sóg ti jagy ve m̄an gé. Iso rará ag tóg, tá, k̄y sóg vēnhm̄y en m̄an gé sir. ⁶Hā ra Topē tóg inh m̄y Tito jēnē, k̄y ti hā tóg inh krī t̄y k̄anhvy' hé. Ūn vēs̄yrēnh m̄y ěn m̄y tóg vī há han tī, Topē ti, hā k̄y tóg inh m̄y Tito jēnē, ěn k̄a. ⁷Ti t̄y inh ki jun k̄y tóg inh m̄y vī há han. K̄y tóg inh m̄y ājag t̄y iso vī há han ja tag tó m̄y gé sir, ājag t̄y inh ve sór m̄y tag tó ti m̄y, ājag t̄y vēnh jykre kórég to vēnhm̄y en ěn k̄amén ti m̄y, ājag t̄y inh jagfy vēnh vī tó sór m̄y tó ti m̄y gé inh m̄y. S̄y tag mē k̄y tóg inh m̄y sér gy tī sir.

⁸Inh carta t̄y ājag ki jun k̄y tóg ājag fe kaj han, isȳ rá ti. Hā ra tóg há tī. Ājag fe kaj han tóg, kurā pir ki, k̄y ājag tóg ājag jykre kórég ěn tovānh ja nī, hā k̄y tóg inh m̄y sér tī. Ūri tóg inh m̄y sér tī, isȳ carta rán k̄y jēnē ja ěn m̄y ěkrén k̄y, hā k̄y sóg rán tūg sór ja tū nī. ⁹Inh m̄y tóg sér tī. Hē ri ken k̄y? Ājag fe kaj m̄y inh m̄y sér tī? Vó. Ājag t̄y ājag fe kaj t̄y ājag m̄y jagy t̄in k̄y ājag jykre kórég ěn tovānh k̄y tóg inh m̄y sér tī. Ājag fe kaj tugr̄in ājag tóg Topē m̄y vēnh fēg, k̄y inh carta tóg ājag m̄y nēn (ū) kórég k̄amén ja tū nī. ¹⁰Ěg t̄y ěg fe kaj tugr̄in Topē m̄y vēnh fēg k̄y ěg tóg ěg jykre kórég tovānh k̄an ke m̄y, k̄y ěg krenkren ke m̄y. Tag v̄y ěg m̄y sér tī. Jāvo ěg t̄y fe kaj ra ěg jykre kórég tovānh tū n̄in k̄y ěg ter pē han ke m̄y sir.

¹¹Ha vé. Ājag fe kaj t̄in k̄y ājag tóg ājag jykre tugn̄ym m̄y sir, Topē t̄y ājag kr̄in k̄y. Vēnh jykre kórég ěn to ājag tóg jū m̄y sir, kanē jur han ājag tóg m̄y sir, k̄y ājag tóg: “vēnh jykre kórég ěn han sór tū ěg tóg n̄igtī,” he m̄y sir. Inh ve sór ājag tóg m̄y nī sir, vēnh jykre kórég t̄y ājag tóg tū' he sór m̄y, ūn t̄y vēnh jykre kórég han m̄y ěn m̄y vī tar han sór ājag tóg m̄y. Há kar ti nī. Hā ki tóg ājag t̄y ti mré ti jykre kórég ěn han ja tū (tóg) ve há tī sir.

¹²Isȳ ājag m̄y carta ěn rán k̄y sóg ū t̄y vēnh jykre kórég han m̄y ěn tó ja nī, ti t̄y ūn m̄y ti kórég han m̄y ěn tó ja inh nī gé. Hā ra sóg tag to jykrén, s̄y rán k̄y, ha mē: “isȳ Corinto tá ke ag t̄y iso há n̄ytī venh há tóg tī, ag t̄y ājag t̄y iso há n̄in ki kanhr̄an jé, Topē r̄inve,” he ja sóg nī, hā k̄y sóg carta ěn rán ja nī. ¹³Hā k̄y inh krī tóg k̄anhvy' he m̄y sir, isȳ ājag t̄y iso há n̄yt̄in mēn k̄y. K̄y inh krī t̄y k̄anhvy' hen mré tóg inh m̄y sér pē tī gé sir, Tito t̄y ājag to vī há han k̄y. Ti krī t̄y kupr̄a' he ja ājag tóg nī, ti t̄y ājag mré n̄in k̄y, k̄y tóg ti m̄y há tī gé. ¹⁴Ti m̄y sóg ājag k̄amén ja nī, ājag t̄y ti m̄y vī há han ke tag ti. Ti tūg ke to hā sóg ti m̄y ājag k̄amén ja nī, hā ra ājag tóg ti m̄y ki hā han ja nī. Inh kavénh ja tū ājag tóg nī. Ha vé, ājag m̄y sóg ki hā tó há han tī. K̄y tóg ri ke nī ja n̄igtī, s̄y Tito m̄y ājag to vī há han ja n̄in k̄y. Ki hā han ja ājag tóg n̄igtī.

¹⁵K̄y tóg kurā kar ki ājag m̄y ěkrég tī, ājag to tóg há tāvī nī, Tito ti. Ājag t̄y inh vī kri n̄im m̄y ěn m̄y tóg ěkrég tī, ājag t̄y inh kamēg m̄y ěn m̄y, k̄y

ājag nēji ti kamēg ja nī gé, isy ti jēnēn kŷ. Hã tó tóg tī. ¹⁶Kŷ tóg inh mŷ sér tī gé sir, ājag tŷ inh kavēnh ja tũ nīn kŷ, ājag tŷ inh vī ki króm kŷ.

Ēg tŷ jänkamy nīm ke

8 ¹Kŷ sóg ājag mŷ Topē tŷ ga tŷ Macedônia tá ke ag tar han mũ tó sór mũ gé, Macedônia tá igreja krēm vēnhmān kŷ nŷtī ag, ũ tŷ tá vēnh pānpin tī ag. Ājag jagāgtar hã ra ag tóg Jerusalém tá ke ag jagāgtān sór mũ, ag mŷ jänkamy jēnēn kŷ. ²Ha vé, ti jagy pē hã ve ja ag tóg nigtī, Macedônia tá ke ag, ag jykre há vēnh ven jé. Ge ra tóg ag mŷ sér tī. Jagāgtar ag nŷtī gé, tŷ nén (ũ) mág tũ ag nŷtī. Hã ra ag tóg, ag mŷ sér nīn kŷ (ag tóg) vin mág pē han ja nigtī, ag jagtar mág mũ ra. Ag tŷ Jerusalém ra jänkamy jēnē sór vē. ³Ha vé, ag jykre ve inh. Ājag tŷ nén (ũ) tŷ vēnh kãpām ag tóg, ag jēn mré hã. ⁴To ag tóg inh mŷ to vī mág, isy ag mŷ: “ājag tũ tŷ vēnh kãpām tũg nī,” he tũ nīn jé. Ag tŷ Topē tũ ag mŷ nén ũ há han sór vē. Tag hã ne ag mŷ sér tī, Topē tŷ tag to ag tar han kŷ, hã kŷ ag tóg inh mŷ: “ēg tŷ ag mŷ jänkamy jēnē sór vē,” he mũ. ⁵Kŷ ag tóg vēnh jykre há han, isy ag ki vēnh jykre há ve sór mũ ěn kãfór. Ēg Senhor mŷ ag tóg vēnh vin, kar kŷ ag tóg inh mŷ vēnh vin gé, Topē tŷ ag mŷ: “ha ti mŷ vēnh vin,” hen kŷ.

⁶Kŷ sóg Tito mŷ ké, ti tŷ ājag ki jänkamy ũ ve jé, ājag tŷ Jerusalém tá ke ag mŷ jänkamy jēnēnh ke ti. Ājag ki tóg hur jänkamy sī vé, kŷ tóg ti tŷ ũri ve kãn há tī, ti tŷ ājag mŷ sér tī jé gé, Topē tŷ tag to ājag tar han kŷ. ⁷Ha vé, Jesus ki ge kŷ ājag nŷtī. Vī há ājag nŷtī. Ki kanhrān mág ājag nŷtī. Ũ jagāgtān sór ājag nŷtī. Jagnē to há ājag nŷtī. Tag kar ki ājag tóg ũn rico ri ke nŷtī. Kŷ nén ũ há tag han sórmnī gé, Tito tŷ ājag ki nén venh ke mũ tag ti.

⁸Inh pi(jé) ājag mŷ: “ker ag jagāgtān tũg hē!,” he sór mũ. Sŷ ājag tŷ vēnh kar to há nŷtī ve sór vē, ājag tŷ ũ ag jagāgtān mũn ki. ⁹Ha vé, ěg Senhor tŷ Jesus Cristo vŷ ěg jagāgtān ja nī gé. Tag ki kanhró ājag tóg nŷtī. Kanhkã tá ti rico nī ja nigtī, hã ra tóg ã tŷ nén (ũ) ěn tovānh kãn. Ā tŷ ěg jagfy jagtar tī jé tóg kãtig. Kŷ ěg tóg ti jagtar tũgrīn rico nŷtī sir.

¹⁰Kŷ sóg tag to jykrén, ha mē. Ano ti nī ha, ājag tŷ ag mŷ jēnēnh ke tŷ vyrmŷ vin han vén kri. Ājag hã ne to jykrén vén ja nigtī gé, Jerusalém tá ke ag mŷ jänkamy jēnēnh ke to. ¹¹Kŷ ājag tŷ nén han vén ja ěn han kãn nī, ũri. To jykrén ja ājag tóg nigtī, kŷ han kãn sórmnī gé. Ājag tŷ vyrmŷ nén vin ja ěn kri vin mãn nī, ag mŷ jēnēn jé. ¹²Ājag tŷ nén nīm kŷ ti tŷ ājag mŷ sér nīn kŷ tóg Topē mŷ há tī. Ũ tŷ nén ũ mág vŷ nīm mág han ke mũ, ũ tŷ nén ũ sī vŷ sīn kŷ nīm ke mũ. Topē pi(jé) ũ tŷ nén ũ sī tŷ nīm mág ve sór mũ!

¹³Ti tŷ ājag tŷ ũ jagāgtān tũgrīn ājag mŷ tũ tīn kŷ tóg Topē mŷ ũ tī sir. Vēnh kar tŷ nén ũ sī ve kŷ tóg há tī. ¹⁴Ũri ājag tũ tóg e nī, hã kŷ tóg ājag tŷ ũn jagāgtar ag mŷ vēnh kãpām há tī. Kejēn tóg ājag mŷ tũ! henh ke mũ gé, kŷ ag tóg sir ājag mŷ nén (ũ) vin ke mũ gé, vēnh kato. Kŷ vēnh kar vŷ jagnē ri ke nŷtī sir. Tag hã vŷ há nī! ¹⁵Hã kŷ tag tóg rán kŷ nī, ha mē: “ũ tóg vējēn génh mág han ja nigtī, ũ tóg génh pir han ja nigtī gé. Kŷ ũ tŷ génh mág han mũ mŷ tóg kãfór ja tũ nigtī, hã

ra ũ tỹ génh pir han mũ ěn mỹ tóg tũ' he ja tũ nĩgtĩ gé," he tóg mũ, Topě vĩ rá ki. Jagně ri ke ag tóg nỹti ja nĩgtĩ. Hã kỹ tóg ěg tỹ ũ tỹ nén (ũ) pir nĩ ěn jagăgtăn há tĩ.

Tito to vême

¹⁶Topě hã ne Tito fe han!, ti tỹ ājag to há tăvĩ nĩ jé. Kỹ sóg Topě mỹ vĩ há han tĩ sir, ti tỹ ti fe han kỹ. ¹⁷Kỹ tóg kănhmar inh mỹ: "hej," hě, sỹ ti mỹ: "ha Corinto ra tĩg," hen kỹ. Kănhmar tóg tĩg sór ja nĩ, Tito ti. ¹⁸Kỹ sóg ti mré ěg régre ũ jěně sór mũ gé. ěg régre tag vỹ Jesus kămén tĩ, kỹ igreja krêm vėnhmăn kỹ nỹti ag kar vỹ ti to vĩ há han tĩ, ũ tỹ ěmă kar ki Topě vĩ to vėnh pănpin tĩ ag. ¹⁹Kỹ igreja krêm ke kar vỹ ti hã kuprėg, ti hã tỹ inh mré ěg tỹ ũn jagăgtar ag mỹ nén jěněnh ke tag ki rĩr jé. ěg Senhor tỹ ũn mág nĩ tag vėnh ven hã jé ěg tóg tag ki rĩr sór mũ, ěg tỹ ag jagăgtăn ke tag ti ki. Kỹ tóg inh mỹ há tĩ gé, sỹ inh pir mỹ ki rĩr tũ nĩn kỹ.

²⁰Kỹ ũ tóg iso jykrén kónăn ke tũ nĩ gé, isỹ inh pir mỹ ki rĩr tũ nĩn kỹ. Jănkamy e vė, ěg tỹ ma mũnh ke ti, kỹ tóg inh mỹ ũ tỹ tag to iso jykrén kónăn ha mě tĩ. Kỹ tóg inh mỹ há tĩ, ũ ag tỹ inh mré ki rĩr mũn kỹ. ²¹Isỹ vėnh jykre kuryj han sór vė, hã to sóg jykrén tĩ. ěg Senhor ne inh jykre ki kanhró nĩ!, kỹ tóg há tĩ gé, ěpră ke ag tỹ inh jykre há vėg mũn kỹ.

²²Inh mré tĩg ke mũ tag vỹ Tito mré ājag ki jun ke mũ, kar kỹ ěg régre ũ ke gé. ěg régre tag hã ne ěg Senhor tũ ki rĩr há han tĩgtĩ!, tag ve tỹ hěn ri ke han inh huri. Ti tũ ki rĩr nĩ vỹ ti mỹ sér tĩ. Kỹ tóg ājag vême mě, hã kỹ tóg ājag ve sór mũ. Ājag to tóg há tăvĩ nĩ, ti tỹ ājag vême měn kỹ.

²³Kỹ Tito ne ājag venh kătĩg ke mũ!. Inh mré rănhrăj jafă vė, Tio ti, kỹ tóg inh mré ājag to văsăn tĩ. Ti mré kămũ tag ag vỹ tỹ ũn há nỹti gé. ũ tỹ igreja krêm vėnhmăn kỹ nỹti ag vỹ ag jėgně ja nĩ, ājag to. Ag tỹ Cristo jykre há ěn han kỹ nỹti vỹ ve há tĩ. ²⁴Ag tỹ ājag ki junjun kỹ ag ki rĩr há han nĩ, vėnh kar tỹ ve jé, ājag tỹ ag to há nỹti ti, igreja krêm vėnh pănpin tĩ ag kar tỹ ājag jykre há ve jé. Vėnh kar mỹ sóg ājag to: "vĩ há tăvĩ han ag tóg tĩ," he tĩ. Kỹ Tito ag mỹ vĩ há han nĩ, ke tũ nĩ (mũ) ra sóg ón ja nĩnh mũ.

Ag tỹ jănkamy jěněnh ke

9 ¹Kỹ ājag tóg, ěg tỹ Jerusalém tá Topě ki ge kỹ nỹti ag mỹ jėgněnh ke tag ki kanhró (ājag tóg) nỹti, hã kỹ sóg tó sór tũ nĩ. ²Ag jagăgtăn sór ājag tóg mũ, ki kanhró sóg nĩ. Hã kỹ sóg Macedônia tá ke ag mỹ tó tĩ. Ag mỹ sóg: "Grécia tá ke ag ne Jerusalém tá ke ag mỹ nén ũ jěně sór tĩ," he tĩ. "Kri prỹg tóg nỹ ha, ag tỹ nén ũ jěně sór mũn kri," he sóg tĩ, ājag to. Kỹ ag tóg ke sór mũ gé sir, ājag kóm. ³Hã kỹ sóg ājag mỹ ěg régre ag jėgněg mũ, ājag tỹ ki kanhrăn jé, sỹ ājag kămén mũ ti. Kỹ ājag tỹ nén (ũ) nĩm sór mũ ěn vin kăn nĩ, ũri, kỹ sóg fagrĩnh mỹ vĩ ja tũ nĩnh mũ. ⁴Hěn ri ke mũn Macedônia tá ke ũ ag tóg inh mré kămũ sór mũ. Kỹ tóg ājag tỹ nén vin ja tũ nĩ kỹ inh mỹ'a tĩnh mũ, isỹ ón kỹ vĩ ja nĩn kỹ. Kỹ tóg ājag mỹ'a tĩnh mũ gé sir. ⁵Hã kỹ sóg to jykrén, sỹ ājag mỹ ěg régre tag ag jėgně jé, inh kătĩg ke to hã, ājag tỹ nén vin han kăn jé, ājag tỹ nén (ũ) tỹ ěg mré ke ag jagăgtăn ke ti. Văsỹ ājag tóg tó ja nĩ, ājag tỹ nén vin sór mũ ěn ti, kỹ ha vin han,

kỹ tóg e nĩnh mũ, jãnkamy ti, kỹ tóg ve há tĩ, ti tỹ ãjag mỹ sér nĩ ti. Kỹ ù tóg ãjag to: “ti mỹ ag mỹ há tũ ja, hã kỹ ag tóg nĩm sĩ han ja nĩ?” henh ke tũ nĩ.

⁶Kỹ sóg tag tó sór mũ, ha mẽ: “ù tỹ ti fy pir krãn kỹ tóg pin kỹ génh ke mũ gé sir. Û tỹ krãn mág mũ ên hã tóg génh mág han ke mũ gé sir,” he sóg ti. ⁷Kỹ ãjag tỹ nén to jykrén mũ ên hã vin nĩ, ãjag tỹ Jerusalém ra jẽnê jé. Ti tỹ ãjag mỹ sér tũ nĩn kỹ tóg há tũ nĩ. Inh pi(jé) ãjag mỹ vi tar han mũ!. Mỹ sér nỹtĩmni, ãjag tỹ êg mré ke ag jagãgtãn to, kỹ tóg Topê mỹ há tĩ sir. Û tỹ ge to tóg há tãvi nĩ. ⁸Kỹ Topê tóg to tar nĩ gé, ãjag mỹ nén vin mág han ke to, ãjag tũ tỹ ãjag ki e nĩ jé, kurã kar ki, nén ù tỹ ãjag mỹ tũ! he tũ nĩ jé. Kỹ tóg, ãjag tũ tỹ ãjag ki mág nĩn kỹ (tóg) ãjag tỹ ù jagãgtãn!, ù jagãgtãn! henh há tĩ sir. ⁹Tag vỹ rán kỹ nĩ, ha mẽ: “ùn jagãgtar ag mỹ tóg vin mág tĩ, ti tỹ êg mỹ vènh vi há tó tóg tũ! henh ke tũ nĩ,” he tóg, Topê vi rá ki.

¹⁰Ha vé, Topê ne êg mỹ nén (ù) kar fy vin mũ!, êg tỹ krãn jé, kỹ tóg êg mỹ pão han jafã nĩm mũ gé, êg tỹ tỹ pão han kỹ kon jé. Kỹ tóg ãjag mỹ ãjag tỹ tỹ ù jagãgtãn ke mũ ên ven mũ gé, kỹ tóg nén ù fy ri ke nĩ. Kanê há ri ke han jé tóg ke mũ gé, ãjag tỹ vènh jykre kuryj tag han kỹ, hã vỹ: jagnê jagãgtãn, he mũ. ¹¹Tag ki ãjag tóg rico nỹtĩnh ke mũ, ãjag tỹ vènh kar jagãgtãn kỹ. Kỹ ag tóg e nỹtĩnh mũ gé sir, ù tỹ êg tigrĩn Topê to vi há han mũ ag, ag tỹ êg tỹ ag jagãgtãn tigrĩn Topê to vi há han kỹ. ¹²Kỹ tóg ge nĩ. Êg tỹ Topê ki ge kỹ nỹtĩ ag jagãgtãn kỹ êg tóg ag jagãgtar tỹ tũ! he mũ. Tag tóg há tĩ. Hã ra ag tóg êg tỹ ag jagãgtãn tigrĩn (ag tóg) Topê mỹ vi há han ke mũ gé sir. ¹³Hã ki ag tóg ãjag tỹ Topê vi kri fig mũ vég mũ, ãjag tỹ ag jagãgtãn ki. Kỹ ag tóg tag to Topê to vi há han ke mũ gé sir, ha vemnĩ. Cristo to vème to ãjag nêji há nỹtĩ. Hã ve jé ag tóg ke mũ, ãjag tỹ ag jagãgtãn mág kỹ, ãjag tỹ vènh kar jagãgtãn kỹ ke gé. ¹⁴Kỹ ag tóg ãjag to Topê mré vèmén ke mũ gé sir, ãjag to há tãvi nỹtĩn kỹ. Topê tỹ ãjag jagãgtãn há pè han mũ ên ve jé ag tóg ke mũ, hã kỹ ag tóg ãjag ve sór ke mũ gé sir. ¹⁵Topê ne êg mỹ nén ù há tãvi vin tĩ mỹ! Pi(jé) kaja nĩ!, ti tỹ êg mỹ nén vin mũ ti. Êg jé ti mỹ to vi há han, ti mỹ agradece hen kỹ.

Paulo tỹ nén to vĩ

10 ¹Ha vé, ãjag jyvèn sór inh mũ, inh, hã vỹ: Paulo, he mũ. Sỹ ãjag mré nĩn kỹ sóg nêji komêr hã vi tĩ, kỹ, isỹ kór há tá nĩn kỹ isóg nêji vi jũ han tĩ ãjag mỹ. Cristo ne komêr hã vi tĩ. Ûn há vè, Cristo ti. Ti jykre hã han sór inh nĩgtĩ. ²Hã kỹ sóg ãjag mỹ tag to vĩ sór mũ, ha mẽ. Isỹ ãjag mỹ nén rán mũ tag jèmèmnĩ. Kỹ sóg ãjag ki jun kỹ vi jũ han ke tũ nĩ. Vi jũ han jé sóg ke mũ, ha vemnĩ, ù tỹ inh kato vi mũ ag mỹ, ù tỹ iso: “ã tỹ vèsóg ki nén to jykrén mũ ên hã han tóg tỹ,” he mũ ag mỹ. ³Èprã ke vỹ tỹ inh nĩ, hã ra inh pi(jé) èprã ke jykre han kỹ vènh jykre kórég han to vãsãn tĩ! ⁴Vãsãn mág sóg tĩ, hã ra inh pi(jé) èprã ke ag jykre han kỹ vãsãn mũ!. Topê jykre tar ên hã han kỹ sóg hã to vãsãn tĩ, kỹ tóg soldado tỹ rará jafã ri ke nĩ, Topê jykre tar ti. Tỹ sóg êg kato tẽ mũ ag vènh pigju jafã mág ên kókég tĩ, hã vỹ: isỹ ù tỹ êg vi kato vãsãnsãn mũ ag vi tỹ tũ! he mũ, he mũ. ⁵Û tỹ Topê kato vi sór mũ ag vi tỹ sóg tũ! he tĩ gé. Vèsỹ ùn mág han sór ag tóg nỹtĩ, Topê kato vãsãn kỹ, êg tỹ Topê jykre ki kanhrãn mũ kato vãsãn kỹ. Tỹ tũ! he jé sóg

ke mū, Topē jykre tar hã tỹ. Ęprã ke ag tỹ Topē vĩ kato tẽ mū ag tỹ Cristo krẽm ge han kãn sór sóg mū, kỹ ag sigse kỹ nỹtĩ ri ke vẽ sir. ⁶Kỹ, sỹ ãjag tỹ Topē vĩ kri nĩm mū ve kỹ sóg ù tỹ kri fi sór tũ ag mỹ vĩ jũ han ke mū sir, ha vemnĩ.

⁷To jykren há han nĩ, ha mẽ. “Tỹ sóg Cristo mré ke nĩ,” he ãjag tóg tĩ, ãjag kãmĩ ù. Kỹ to jykren há han nĩ. Tỹ sóg Cristo mré ke nĩ gé, inh, ãjag kóm mỹr, ha mẽ. ⁸Ęg Senhor ne inh fẽg!, sỹ ãjag jyvẽn jé. Ti pi(jé) inh mỹ: “ha ag kókén,” hé!. Kỹ sóg ãjag mỹ tó, Ęg Senhor tỹ inh fẽg ja ti. Isỹ vẽso vĩ há han hã vẽ. Ge ra tóg inh mỹ'la tũ nĩ, isỹ vẽso vĩ há han mũ ti. ⁹Sỹ ãjag jyvẽn sór vẽ. Inh pi(jé) ãjag kanẽ jun sór mũ!. Ąjag jyvẽn hã jé sóg ãjag mỹ rán. ¹⁰Inh carta ki inh nẽji ãjag mỹ vĩ tar han tĩ, vĩ jũ, kỹ sỹ ãjag mré nĩn kỹ sóg nẽji krój nĩ ve nĩ, kỹ inh vĩ nẽji tóg tỹ nén ù tũ nĩ ve nĩ. ¹¹Tag to jykren, ha mẽ: isỹ rán mũ ri ke han jé sóg ke mū, isỹ ãjag mré nĩnh ken kỹ, ha mẽ. Ąjag vég tũ sóg nĩ, isỹ carta tag rán kỹ. Isỹ ãjag mré nĩnh ken kỹ sóg inh vĩ tag ri ke han ke mū, ha vemnĩ.

¹²Ąjag kãmĩ ù tóg vẽso vĩ há han sór tĩ. Inh pi(jé) ag ri ke nĩ, inh pi(jé) tỹ ag mré ke nĩ gé!. Vẽsóg ki to jykren kỹ ag tóg nén ù to: “tag vỹ há nĩ, tag vỹ há tũ nĩ,” he tĩ. Tag to jykren kỹ ag jykre tóg ag mỹ há nĩ ve nĩ. Topē jykre ve vén sór tũ ag tóg nĩ. Ag tỹ vẽsóg ki nén to jykren hã tóg ag mỹ há tĩ. Krĩ tũ ag nỹtĩ.

¹³Ag jãvo sóg Topē jykre vég tĩ, hã kỹ sóg ãjag mỹ: “inh jykre vỹ há nĩ,” he tĩ. Topē ne inh mỹ inh rãnhraj ti nĩm, kỹ tóg inh mỹ: “ha Corinto tá ke ag ki rĩr,” he ja nĩgtĩ gé. ¹⁴Inh pi(jé) Topē tỹ inh mỹ vẽn hãnhraj nĩm ěn pãtén tĩ!, kỹ sóg pãtén ja tũ nĩ gé, sỹ ãjag mỹ rán kỹ. Inh hã ne ãjag mỹ Cristo kãmén vén ja nĩgtĩ!. ¹⁵Hã kỹ sóg isũ tỹ ãjag jyvẽn tĩ. Ũ tũ pijé!. Inh pi(jé) ù rãnhraj to: “isỹ han ja vẽ,” he mũ!. Isũ hã ki sóg tỹ ùn mág nĩ. Kỹ sóg tag to jykren mũ gé, ha mẽ: ãjag tỹ Topē ki ge kỹ nỹtĩ to tar nỹtĩn kỹ sóg tỹ ùn mág tãvĩ nĩnh ke mũ gé, ãjag mré. Isũ hã vẽ, inh rãnhraj hã vẽ. ¹⁶Kỹ sóg ãjag jamã mã ra tĩg sór mũ gé, sỹ Cristo kãmén jé, ù tỹ ag mỹ tó ja tũ ěn ra. Sỹ tãtã ag mỹ kãmén kỹ sóg inhhã ki rãnhraj mũ sir, ù tỹ ag mỹ tá Topē vĩ kãmén ja tũ nĩn kỹ. Kỹ sóg inh rãnhraj hã tugnĩn tỹ ùn mág jẽn h mũ, ù rãnhraj tugrĩn ke tũ vẽ.

¹⁷Hã ra tóg há tũ tĩ, ěg vẽme tag ti. Ąjag tỹ ùn mág nĩ tó sór kỹ ěg Senhor ti tómnĩ. ¹⁸Ęg tỹ vẽso: “ũn há vỹ tỹ inh nĩ,” he mũ ra ěg pi(jé) tỹ ùn há nỹtĩ!. Ęg Senhor tỹ ěg to: “ũn há vỹ tỹ ã nĩ,” hen hã kỹ ěg tóg tỹ ùn há nỹtĩ.

Ōn kỹ apóstolo ag

11 ¹Iso fe nỹtĩmnĩ. Krĩ tũ nĩ ve inh nĩ, isỹ vẽso kỹ. Hã ra ãjag tóg iso fe nỹtĩ, kỹ tóg há tũ. ²Ąjag to sóg há pẽ nĩ, Topē tỹ ãjag to há nĩ ri ke, hã kỹ sóg ãjag jyvẽn tĩ. Kỹ ãjag tóg ùn mén ke mũ fi ri ke nỹtĩ, kỹ Cristo vỹ ãjag mén ke ri ke nĩ sir. Vẽn hãnhraj tag to sóg ãjag kãn sór mũ mỹr, ãjag jãnhkri nỹtĩ jé, tãtãg tỹ mén ja tũ jãnhkri ri ke. ³Hã ra sóg ãjag to: “ag mỹ ti tovãnh sór tũ nĩ vỹ?” he mũ. Pỹn vỹ Eva fi mỹ ón, Japo ti, ti jykre (ka)mẽ nĩn kỹ, kỹ fi tóg ti vĩ kri nĩm. Kỹ tóg ãjag mỹ ón sór mũ gé, Japo ti, ãjag tỹ Cristo tovãnh jé, ãjag tỹ ti jykre pir tovãnh jé, ãjag tỹ ti to tar ěn to krónh ke jé. ⁴Hã kỹ ãjag tóg ù ag vĩ jẽmẽ sór mũ, ag tỹ ãjag mỹ ón kỹ Jesus tó kỹ, ag tỹ isỹ ãjag mỹ nén tó mũ ěn hã tũ tó mũ ra ãjag tóg jẽmẽ sór tĩ. Ōn

kỹ jagrẽ vỹ ãjag mỹ há nĩ ve nĩ, Topẽ tỹ ãjag mỹ nĩm ja tũ ên. Ôn kỹ topẽ vỹ vỹ ãjag mỹ mẽ sêr tĩ ve nĩ, ãjag tỹ vẫsỹ mẽ ja tũ ên. Vẽnhmỹ han sór ãjag tóg mũ.

⁵Ôn kỹ apóstolo ag ne ãjag mỹ vẽnh vỹ tag tó sór mũ. Inh pi(jé) tỹ ag krêm ke nĩ, ha mẽ. ⁶Vĩ sĩnvĩ han tũ inh nễji nĩ, ag vĩ sĩnvĩ ri ke han tũ inh nễji nĩ. Hã ra sóg nén tỹ hẽn ri ke ki kanhró nĩgtĩ, tag ve ãjag tóg mỹr, ãjag tỹ inh vĩ mẽ tỹ hẽn ri ke han mũ ên ki.

⁷Ãjag mỹ sóg Topẽ vĩ to ja nĩgtĩ, kỹ sóg tag to ãjag ki ti kaja ve sór ja tũ nĩ. Vễsỹ ùn sĩ han ja inh nĩ, sỹ ãjag mré nĩn kỹ, ãjag tỹ tỹ ùn mág nỹtĩ jé, isugrĩn. Tag tugrĩn inh mỹ Topẽ vĩ mranh'? Vó, vẽnh jykre há vé. ⁸Êmã ù tá Jesus ki ge kỹ nỹtĩ fag ne inh mỹ fag jãnkamy vẽnh kãpãm, kỹ fag tóg inh mỹ ti jẽnê ja nĩ, sỹ ãjag mré nĩn kỹ. Fag tũ há ko ja inh nĩgtĩ. ⁹Kỹ, isỹ jãnkamy ve sór mũ ra sóg ãjag mỹ tó ja tũ nĩ gé. “Ti hỹn ag mỹ jagy tĩnh mũ,” he sóg tĩ, há kỹ sóg ãjag mỹ to ja tũ nĩ. Ga tỹ Macedônia tá êg régre ag ne inh ki junjun ja nĩgtĩ, sỹ ãjag mré nĩn kỹ, kỹ ag tóg inh mỹ jãnkamy ù ma kãmũ ja nĩ gé, sỹ to nén tỹ inh mỹ tũ nĩ ên mãn jé. Gen kỹ sóg isũ vég tĩ há ra, ti tỹ ãjag mỹ jagy tũ nĩn jé. Inh jykre nã há vẽ. Tovãnh sór tũ inh nĩgtĩ. ¹⁰Ki há tó sóg tĩ, Cristo tỹ ki há tó tĩ ên ri ke han sóg tĩ. Kỹ sóg ãjag to: “ga tỹ Grécia tá ke ag vỹ jãnkamy to inh jykre ki kanhrãn kãn ke mũ, ag tỹ iso vĩvĩ he tũ nĩn jé,” he mũ. ãjag jãnkamy ve sór tũ pẽ inh nĩgtĩ. ¹¹Hẽ ri ken kỹ? Inh mỹ ãjag to há tũ nĩgtĩ? Vó, ãjag to sóg há tãvĩ nĩ, kỹ Topẽ ne ki kanhró nĩ!

¹²Hã ra sóg ãjag tũ ve sór tũ nĩ, sỹ ag vĩ tỹ tũ! hen jé, ôn kỹ apóstolo ên ag vĩ ti. Inh mỹ tóg ag tỹ ãjag mỹ: “Paulo ri ke inh nĩ. Inh mỹ ãjag tũ vẽnh kãpãm,” henh ha mẽ tĩ. Hã kỹ sóg ãjag tũ ve sór tũ nĩ. ¹³Ôn kỹ apóstolo vỹ tỹ ag nỹtĩ, mỹr, ha mẽ, ôn kỹ ag tóg: “Topẽ rãnrhãj han êg tóg mũ,” he tĩ. Ôn kỹ ag tóg: “Cristo vỹ êg tỹ apóstolo han,” he tĩ. ¹⁴Satanás jykre há vé. Vễsỹ tóg Topẽ tỹ jẽnê jafã ri ke han tĩ, ôn kỹ, Satanás ti. ¹⁵Kỹ Satanás mỹ rãnrhãj tĩ ag tóg ôn kỹ (ag tóg) jykre kurj nỹtĩ ve nĩ gé. Hã ra Topẽ tóg ag vóg kónãn ke mũ, ag rãnrhãj kórég to.

Paulo jagtar

¹⁶Ha mẽ, tó mãn jé sóg ke mũ, sỹ tó ja ti. Inh pi(jé) krĩ tũ nĩ! Isỹ ãjag mỹ krĩ tũ nĩ ve (hã) ra, ge ra iso há nỹtĩmũnĩ, sỹ vễso vẽnh vĩ há tón kỹ. ¹⁷Sỹ ãjag mỹ sỹ nén ve ja ên tó sór vẽ, kỹ tóg inh krĩ tũ nĩ ve nĩ. Sỹ vễso vĩ há han kỹ sóg krĩ tũ nĩ ve nĩ. Êg tỹ êg Senhor jykre tó kỹ êg tóg tag tó tũ nĩgtĩ, sỹ tónh ke tag. ¹⁸Hã ra sóg tó sór mũ. Vẽnh kar tóg ãjag mỹ ag tỹ nén ve ja tó tĩ, kỹ sóg ãjag mỹ sỹ nén ve ja ên tó sór mũ gé, ha mẽ. ¹⁹Krĩ há ãjag nỹtĩ, ge ra ùn krĩ tũ ag tóg ãjag mỹ há nỹtĩ ve nĩ. ²⁰Û tỹ ãjag mỹ: “tag han ra, tag han tũg ra,” hen kỹ tóg ãjag mỹ sêr tĩ ve nĩgtĩ. Û tỹ ãjag tũ mãn sór kỹ tóg ãjag mỹ há tĩ ve nĩgtĩ, ù tỹ ãjag mỹ un'lon mũ ag tóg ãjag mỹ há nỹtĩ ve nĩgtĩ, ù tỹ vễso: “tỹ inh ùn mág nĩ,” he mũ ag vỹ ãjag mỹ há nỹtĩ ve nĩgtĩ gé, ù tỹ ãjag kakã ki tãnh tĩ ên ag ke gé. Û tỹ ge vỹ ãjag mỹ há kar nỹtĩ ve nĩgtĩ. ²¹Inh mỹ'a tóg tĩ, sỹ tag tó kỹ. Vẽnh jykre tag to sóg krój nĩ, tag han sór vãnh inh nĩgtĩ, ag tỹ han ri ke tag.

Hã ra ag tóg ãjag mỹ ag tỹ nén ve ja ên ti tó sór mũ, ôn kỹ apóstolo ên ag, ag tỹ nén ù há kar han mũ tó ag tóg tĩ. Kỹ sóg ag ri ke tónh ke mũ gé sir, ùn

krī tū ag ri kén. ²²Hebreu vỹ tỹ ag nỹtĩ. Tỹ sóg Hebreu nĩ gé. Israel krē'krē vỹ tỹ ag nỹtĩ. Tỹ sóg Israel krē'krē nĩ gé. Abraão krē'krē vỹ tỹ ag nỹtĩ. Tỹ sóg Abraão krē'krē nĩ gé. ²³Cristo camarada vỹ tỹ ag nỹtĩ. Tag to sóg ag káfór nĩ hã ra. Ha vé, krī tū pē nĩ ve sóg nĩ, sỹ tỹ ag káfór nĩ tag tón kỹ.

Ha mē, isỹ tỹ Cristo camarada nĩ ti: inh rãnhraj e tag hã to sóg ag káfór nĩ, ise kỹ nĩn e ja hã to sóg ag káfór nĩ gé. Inh mrãnmrãn káfór han ag tóg tĩ gé, ter kren tỹ hēn ri ke ve inh, ag káfór ke gé. ²⁴Judeu ag ne inh mrãnmrãn tỹ 5 (ke) han!, ag tỹ ũ mrãnmrãn tỹ 39 (ke) han tĩ ěn tỹ 5 (ke) han ag tóg isỹ, kurã tỹ hēn ri ke han tóg, ti tỹ 5 (ke) ěn tá krỹg jé. ²⁵Kar kỹ ag tóg ka tỹ inh mrãnmrãn tỹ 3 (ke) han ja nĩgtĩ gé. Kurã tỹ hēn ri ke han tóg ke gé, ti tỹ 3 (ke) ěn tá krỹg jé. Pó tỹ ag inh pin ja nĩgtĩ gé, isén jé, kurã pir ki. Kar kỹ sóg goj ki ter kren tagtũ han ke gé, ěn kã sóg kejēn kuty pir ki kurã mré goj nig kãki nãgnãr, goj kafã tũ kãki. ²⁶Kuvar há ra tĩg tỹ hēn ri ke han inh, kỹ goj var tóg inh jagtar han. Ęg tũ péju(g) tĩ ag vỹ inh jagtar han tĩ. Inh mré ke ag vỹ inh vóg kónãn sór nĩgtĩ, fóg ag ke gé, cidade ki ke ag ke gé, ěmã tũ tá ke ag ke gé. Goj kafã tũ kri inh jagtar han. On kỹ ěg kanhkã ag vỹ inh jagtar han tĩ gé. ²⁷Rãnhraj mág to inh jagtar tĩ gé, to sóg ron tĩ, kỹ sóg nũr tũ tỹ hēn ri ke hyn han tĩ gé. Kejēn sóg kókĩr tĩ, kejēn sóg goj vég tũ nĩgtĩ, vãkre tỹ hēn ri ke han sóg tĩ, kusa mēg sóg tĩ, inh kur tóg iso tũg tĩ gé. ²⁸Kỹ, isỹ kurã kar ki ti jagy tag vég mũ mré hã sóg igreja krēm vėnhmãn tĩ ag to krĩ kufy han tĩ gé. ²⁹Ū tỹ Cristo vĩ to krónh ken kỹ tóg inh mỹ jagy tĩ gé. Ū tỹ Topē vĩ mranh kỹ sóg kanē jur tĩgtĩ gé.

³⁰Kỹ, isỹ vėsó kỹ sóg isỹ nén ũ jagy vég mũ ěn tó sór tĩ, inh krój nĩ ěn ti. ³¹Topē ne ki kanhró nĩ!, ěg Senhor tỹ Jesus jóg ti. Ęg tỹ ti mỹ vĩ há han tóg tũ! henh ke tũ pē nĩ. Ti hã ne ki kanhró nĩ!. Inh pi(jé) ón mũ!. ³²Cidade tỹ Damasco tá sóg nĩ ja nĩgtĩ, kỹ pã'i mág tỹ rei tỹ Aretas ěn krēm pã'i ũ vỹ governo ki rĩr nĩ ja nĩgtĩ. Ęn tóg ijo vãji ja nĩgtĩ. Ti polícia ag tóg ijo vãji ja nĩgtĩ, ag tỹ ise jé. ³³Hã ra inh mré ke ag tóg kěj mág kãkã inh péju kỹ jãnkã ror tỹ isérem, cidade to ró tỹ, hã kỹ sóg kren. Isỹ ti jagy ve jan hã vē.

Paulo tỹ nén nē ve

12 ¹Kỹ ājag tỹ isỹ tỹ ũn mág nĩ tag mē sór kỹ, kỹ sóg ājag mỹ ěg Senhor tỹ inh mỹ nén ven mũ ěn tó sór mũ gé ver, ti tỹ inh mỹ nén kãmén mũ ti. Sỹ ājag mỹ tónh ke tũ vē vē, hã ra ājag tóg mē sór mũ. ²Ha vé, ũ ki kanhró sóg nĩ, Jesus ki rã ũ. ¹⁴(ke) anos ti nĩ ha, ti tỹ kanhkã ra tĩg kri, kanhkã tagtũ he mũ ěn ra. Hēn ri ke mũn tóg ā rĩr há ra vyr, hēn ri ke mũn ti kuprĩg tóg ra vyr, inh pi(jé) ki kanhró nĩ!. Topē hã ne ki kanhró nĩ!. ³Hã ra tóg ra vyr, hēn ri ke mũn ā rĩr há ra, ti kuprĩg hēn ri ke mũn, inh pi(jé) ki kanhró nĩ!, Topē hã ne ki kanhró nĩ!. ⁴Kỹ tóg ěg tỹ hē tá Topē mré nỹtĩnh ke mũ ěn ra vyr, Paraíso he mũ ěn ra. Tá tóg vėnh vĩ jēmē, ěprã ke tỹ nén tónh ke tũ ěn mē tóg tá, kanhkã tá vėnh jykre sĩnvĩ pē ěn, ěg tỹ tag ki nén ki kagtũg ěn. ⁵Ęn hã to sóg: “ũn mág vỹ tỹ inh nĩ,” he sór mũ. Isỹ vėsóg ki kanhkã ra tĩg pijé!. Isỹ ěg tỹ ěprã vég tĩ ěn tó kỹ sóg inh krój nĩ hã tó sór mũ. ⁶Isỹ ũn mág nĩ tag tó kỹ sóg ki hã tó tĩ, vėnh ó pijé!. Hã ra sóg tó tũ nĩ, ājag tỹ iso: “vėnh

kar káfór vỹ tỹ ti nĩ,” he tũ nĩ jé. Inh jykre vég äjag tóg mügtĩ, inh vĩ mēg äjag tóg mügtĩ, kỹ tag hã to jykrén nĩ, tag hã to äjag tóg inh jykre ki kanhrän ke mü.

⁷Kỹ Topē tóg, ti tỹ inh mỹ kanhkã ven kar kỹ (tóg) to jykrén gé, sỹ vēsỹ ün mág han sór tũ nĩ jé. Hã jé tóg inh há tỹ nén ũ jagy ki nĩ han tĩ gé, kỹ tóg sónh tỹ inh ki já ri ke nĩ. Satanás krēm ke ũ vē, kỹ tóg isänh tĩ, isỹ vēsỹ ün mág han tũ nĩ jé. ⁸Kỹ sóg ēg Senhor mỹ to vĩ tägtũ han, ti tỹ inh mỹ tỹ tũ' hen jé. ⁹Hã ra tóg ke jävánh ja nĩ. Kỹ tóg inh mỹ: “ã jagägtän sóg tĩ,” he ja nĩ, “kỹ tóg há tĩ,” he ja tóg nĩ, ēg Senhor ti. “Ä krój nĩ hã ki isỹ tỹ ün tar nĩ ve há tĩ,” he ja tóg nĩ inh mỹ, ēg Senhor ti. Hã kỹ inh krój nĩ tag tóg inh mỹ há tĩ. Inh krój nĩn kỹ sóg Cristo tar hã tỹ tar nĩ nĩ. Tag hã ne há tũ'. ¹⁰Hã kỹ inh krój nĩ tóg inh mỹ sér tĩ, ag tỹ iso vĩ kónän ti ke gé, inh jagtar nĩ ti ke gé, ag tỹ inh vóg kónän ti ke gé, inh kanē jur ti ke gé. Inh mỹ tóg sér kar tĩ, sỹ nén vég mü ti, sỹ Cristo hã tỹ fe nĩn kỹ. Inh krój nĩ ěn kã sóg tar nĩ, mýr, ha mē.

Paulo tỹ Corinto tá ke ag to nén to jykrén

¹¹Ha vé ha, vēsỹ ün krĩ tũ nĩ ěn ri ke han sóg, äjag tỹ inh kutän kỹ. Äjag tỹ iso vĩ há han ke vē vē. Inh pi(jé) ũ tỹ vēsỹ apóstolo han mü ěn ag krēm ke nĩ', isỹ tỹ nén (ũ) tũ hã ra, mýr, ha mē. ¹²Äjag mỹ sóg sỹ tỹ apóstolo jē ven huri. Isỹ nén (ũ) jagy vég mü ra sóg to krónh ke tũ nĩgtĩ. Ęg tỹ nén han vánh hyn han ja inh nĩgtĩ, äjag rĩnve, milagre ti, Topē jykre ti ke gé. Hã ki äjag tóg venh mü, sỹ tỹ apóstolo jē ti. ¹³Kỹ inh äjag mỹ ne han ja tũ nĩ nēji, äjag tỹ ěmã ũ tá Jesus to vėnhmãn tí ag to: “ēg káfór ag nỹtĩ,” hen jé? Nén pir hã han tũ inh nĩ, hã vỹ: äjag jēn ko ja tũ inh nĩ, he mü, sỹ äjag mré nĩn kỹ, kỹ tóg äjag mỹ jagy nĩ ja tũ nĩ. Tag tỹ kórég kỹ inh mỹ vėnh päte fón nĩ.

¹⁴Ha vé ha, sỹ äjag ve män sór vē mýr. Sỹ tag to jykre tägtũ hã vē sir. Kỹ sóg inh jun kỹ äjag mré nĩn kỹ (sóg) äjag mỹ ti jagy nĩm sór tũ nĩ gé, ũri. Inh pi(jé) äjag tũ män sór mü'. Sỹ äjag venh kätĩg ke vē. Ęg krē pi(jé) ēg rico han tĩ', ēg tỹ ag jē'yn mü ra. Ęg hã ne ēg krē mỹ nén ũ nĩm tĩ'. ¹⁵Hã kỹ sóg isũ fón kãn ke mü, äjag tugrĩn, vėnh fėg jé sóg ke mü gé, sỹ äjag krenkren han jé. Äjag to sóg há tävĩ nĩ. Hã kỹ tóg inh mỹ e tí, äjag tỹ iso há tũ nỹtĩ ti. ¹⁶Kỹ äjag tóg ki kanhró nỹtĩ, isỹ äjag mré nĩn kỹ äjag mỹ ti jagy nĩm sór tũ nĩ ti.

Hã ra sóg nēji äjag vatánh tá äjag krĩn tĩ, äjag mỹ sóg nēji ón tĩ. ¹⁷Kỹ inh mỹ äjag vatánh tá äjag tũ mäg tĩ', sỹ äjag mỹ inh mré ke ag jėgnėn kỹ'? Ke tũ sóg nĩgtĩ mýr. ¹⁸Tito mỹ sóg to vĩ, ti tỹ ēg régre ũ ěn mré äjag venh tĩg jé. Kỹ Tito mỹ inh mỹ äjag tũ ma kätĩg ja nĩ'? Ke tũ tóg nĩ, ki kanhró äjag tóg nỹtĩ. Inh jykre hã han tóg tĩ, Tito ti. Isỹ nén han mü ěn hã han tóg tĩ.

¹⁹Äjag hỹn iso: “ón kỹ tóg vėnh jagfy vĩ mü,” he mü. “Tĩ tỹ ēg tỹ ä to há nỹtĩ ěn han sór vē,” he äjag hỹn mü iso. Hã tũ vē, kỹ Cristo vỹ ki kanhró nĩ, Topē ti ke gé. Äjag to sóg há pē nĩ, hã kỹ sóg vĩ mü, äjag tỹ inh vĩ tugrĩn ti hã to tar nỹtĩ jé. ²⁰Tag hã to sóg jykrén mü, ha mē: hėn ri ke mün ēg tóg jagnē tỹ ün mü, sỹ äjag ki jun kỹ. Hėn ri ke mün äjag tóg jagnē to jũ mü, hėn ri ke mün äjag tóg jagnē tũ ki vē'ĩ mü, hėn ri ke mün äjag tóg jagnē to krĩ rỹ nỹtĩ, vėnh kar hėn ri ke mün äjag tũ hã mĩ ěkrén sór tĩ, hėn ri ke mün äjag tóg jagnē to vĩ kónän mü, hėn ri ke mün äjag

tóg jagně to ví ví henh mũ, hěn ri ke mũn ãjag tóg jagně kãfór nýtí sór mũ, hěn ri ke mũn ãjag tóg vênh jykre e han sór mũ. ²¹Kỹ tóg inh mý'a tĩnh mũ, sý ãjag ki jun kỹ, kỹ Topě tý isý ũn sí han ri ke vế sir. Inh fýnh ke vế, ãjag tý vãsý Topě ví mranh ja ên tovãnh sór tũ nýtĩn kỹ, nén ũ kavěj ên ti, ã prũ tũ fi mré nỹ, ã mén tũ mré nỹ, fag to én tí ên mýr. Æjag tý ên tovãnh tũ nĩn kỹ tóg inh mý'a tĩnh mũ.

Paulo tý ag jyvên mãn mũ

13 ¹Sý ãjag ve tãgtũnh ke vế ha. Kỹ sóg ãjag jykre venh ke mũ. Ũ tý ãjag jykre kórég vég mũ vỹ tónh ke mũ, ãjag tý ti kórég han ja ti. Ũn régre vỹ tugtónh ke mũ, ke tũ nĩn kỹ ũn tãgtũ. ²Tag tó inh huri, kỹ sóg tó mãn sór mũ mýr. Sý ãjag mré nĩ ja nĩn kỹ sóg ãjag mý tag tó ja nĩ, kỹ sóg ũri ãjag mý rán mũ sir, sý ãjag mré nĩ tũ nĩn kỹ, ha mẽ. Sý ãjag mré nĩ ja nĩn kỹ sóg koměr hã ví ja nĩ, ũ tý Topě ví mranh ja ên ag mý. Inh jun mãn kỹ inh pi(jé) koměr hã ví mãn mũ', ha vemnĩ. Vĩ tar han jé sóg ke mũ mýr. ³Cristo ví mẽ sór ãjag mũ, inh ki. Mẽ jé ãjag tóg ke mũ. Ti pi(jé) krój nĩ'. Tar ti nĩ, hã kỹ sóg ví tar han ke mũ gé. ⁴Krój nĩ ve ja ti nĩ, ti tý cruz to sa kỹ. Hã ra tóg rĩr mãn, Topě tý ti rĩn mãn kỹ. Topě tar nĩ hã vế. Kỹ sóg krój nĩ gé, sý ti ki rã kỹ jèn kỹ, hã ra sóg ti mré rĩr kỹ jé gé, ãjag mý, Topě tar nĩn kỹ.

⁵Æjag jykre tugnỹm nĩ. “Inh mý Jesus ki rã há han mũ vỹ?” hemnĩ, vëso jykrén kỹ. “Jesus Cristo mý inh kãkã nĩ?” hemnĩ. Æjag tý tag to: “hỹ, hã vế,” he tũ nĩn kỹ ãjag pi(jé) tý ti tũ nýtĩ'. Ên kã ãjag tóg ti tovãnh kỹ mũ nĩ sir. ⁶Hã ra sóg ti tovãnh ja tũ nĩ. Æjag tý tag ki kanhrãn kýn há tí. ⁷Æjag to sóg Topě mré vëmén tí, ãjag tý nén ũ kórég han tũ nĩ jé. Kỹ inh rãnhraj tóg Topě mý há tí sir, vênh kar mý ke gé. Ag tý hã ra iso é he mũ ra nén ũ há tãví han sórmnĩ, ha mẽ, kỹ ãjag tý Jesus tũ hã han ke mũ tag ne há tãví nĩnh mũ'. ⁸Inh pi(jé) ũ tý ki hã tó mũ kato tẽ sór mũ'. Ũ tý ki hã tó mũ tag ve sór inh nĩ mýr. ⁹Inh mý tóg sér tí, inh krój nĩn kỹ, kỹ tóg inh mý sér tí gé, ãjag tar nýtĩn kỹ. Hã jé sóg Topě mré ví tí, ti tý ãjag mý vênh jykre há ên nĩm jé, ãjag tý há pẽ nýtĩ jé. ¹⁰Hã kỹ sóg ãjag mý carta tag rán, sý ãjag vég tũ nĩn kỹ. Kỹ sóg koměr hã ví sór mũ, sý ãjag mré nĩnh ken kỹ. Inh pi(jé) ví tar han sór mũ', inh pi(jé) êg Senhor tý isar han kỹ inh ví tar tý ãjag kókén sór mũ'. Æjag tar han sór inh mũ mýr.

¹¹Inh kanhkã', sý ãjag mý rán kãn hã vế. Hã ra sóg ver tag tó sór mũ, ha mẽ: vênh kãn nĩ, ãjag tý kygnęg tũ nĩ jé, inh ví jëmëmni, vênh jykre pir han nĩ, krĩ kuprã nýtĩmni. Topě ne êg to há nĩ', ti ne êg krĩ kuprãg tí'. Ti hã ne ãjag ki rĩr mũ', ãjag tý ti jykre tag han kỹ.

¹²Jagně ki nhun ke ri ke han nĩ, Jesus mré ke kar ki, ãjag tý jagně nĩgé kãgmĩ kỹ. Topě tũ ki ge kỹ nýtĩ kar vỹ ãjag mý: “ãjag mý há?” he sór mũ.

¹³Êg Senhor tý Jesus Cristo jé ãjag tar han tí. Topě vỹ ãjag to há nĩ. Ti kuprĩg vỹ tý ãjag jagrẽ nĩ. Ti jykre hã mũ mũmni. Hã vế.